



浙江圖書館




915-1242
0027




浙江圖書館



浙江圖書館



浙江圖書館



浙江圖書館

30725-3

嘉興府志卷之二十四



浙江圖書館

嘉興府志卷之二十四

嘉興府志卷之十四

知嘉興府事閩陽

吳永芳

纂修

嘉善縣人物

明

孫詢字廷言從里儒徐中授尚書善屬文宣德中分建

縣學攝教事尋應賢良詔授廣西布政司檢校時洞

蠻竊發詢諭之感服遺之金不受遷分宜丞致仕

項忠字蓋臣正統壬戌進士任員外從英廟北狩後遷

廣東副使諜報高州賊數百攜男婦流劫忠以賊無

攜家理訊皆良民盡釋之歷陝西臬使賑活飢民會

2072689

嘉興府志 卷之四
憂去軍民伏闕請畱詔奪情遷副都御史撫陝西開
泉濬渠以溉田復用計平固原土蠻滿四晉右都御
史巡視順天大水賑活飢民二十餘萬出撫荆襄搜
斬亂民李胡子諭散脅從流民四十餘萬晉尚書加
宮保先是百戶韋瑛挾中璫汪直勢屢興大獄忠率
九卿疏劾罷直戍瑛直圖報復誣忠下廷訊落職久
之璫敗復官謚襄毅子經江西叅政授蘇州衛指揮
孫錫光祿寺卿鉅刑部主事

支立字中夫正統甲子舉人孝友清介官翰林孔目與
羅倫友善務敦本爲己之學分校順天巨璫汪直欲

私其姪投千金立發之尋乞歸詩文多關世教語尤
邃于經學號支五經子高孫祿皆以明經爲學博曾
孫大綸進士

周鼎字伯器少警敏以文學知名有金尚書征閩寇辟
置幕府預參籌畫當以功上會金與他使者不協抑
之授沐陽典史值淮民飢請賑濟忤當道意罷歸爲
文嚴整峭厲尤工於詩有土苴集十卷行世

施奇字廷偉景泰甲戌進士授工部主事奉使諸鎮閱
兵砦邊將有餽遺悉却之尋復清匠江西鄉人有官
縣幕者以百金餽奇駭曰是安得此若執汝則賣廉

矣遂揮去擢知太平府改萊州爲人有風操精吏事
郡守楊繼宗造廬蔬食對談盡日乃去

劉侃字克剛景泰庚午舉人知涇州政尚寬簡時征朔
方涇當孔道供億不擾都御史馬文升嘉其才薦守
延平地僻民淳綽有餘閒侃素廉約兩赴官皆鬻產
以行及謝病歸囊篋蕭然自號樂閒公工楷書詩文
亦清麗

楊霖字時望天順中以貢領應天鄉薦知玉田改寶坻
抑強扶弱清白自持有循吏風

夏勛字汝建以明經授懷柔知縣改內丘爲人疎簡不

屑細故居官持法不撓除奸去盜境內肅然值歲稔
寬租賑飢多所全活年五十投綬歸林泉三十年

高第字士元以貢士授永福知縣民多流亡第至廣招
撫給田開墾民復故業

任秦字亨伯成化乙未進士授上饒令有名士婁諒屈
體事之爲政持大體增置學校親爲講授立法清田
以杜爭訟教民盡力陂塘得灌溉時稱循吏

於琿字文端成化甲辰進士知南皮歷陞建寧同知衛
有屯田久侵于民五奏不得白琿按籍還之擢守慶
遠土獠多缺貢賦例出金以陷守琿慮却之生隙以

其物充通賦郡民不知學立程式課生徒致仕歸出
入徒步有長者風

周澤字天雨博學有才詩文清婉成化癸卯解元弘治
庚戌進士任襄陽推官三年獄無冤滯陞福州同知
尋轉贛州卒

錢春字應仁成化丁未進士爲行人遣祭宗藩餽遺悉
却拜御史彈劾不避權貴人皆推服曾孫天胤進士
兵部郎喬孫永善母病刲臂以療邑令旌其門曰純
孝重光以春亦嘗割股也

湯滌字新之成化丙戌進士性剛介爲清豐令耻干謁

有歸志監察使聞其能詩面試之有半明半晦雲間
月如有如無夢裏官之句監察疑其誚已滌曰此余
自輕其官也遂置印綬出行李蕭然士民攀泣有思
菴稿行世

卞謙字信卿弘治壬戌進士授廣信推官爲人機警決
獄稱精允經鉛山嶺道有死尸夢一人云傭者爲主
所殺偵得之竟抵罪郡有巨室殺人匿尸燕室獄久
不決謙廉知發屍遂伏辜郡中稱神明考績入京道
卒聞者惜之從子錫進士官司勳有聲

孫光祖字豹韋孝友力學少遊王文成門以明經授湖

嘉興府志 卷之十四
州訓導遷開化諭修學宮立規條文風丕變卒年八十四祀鄉賢孫在鎬舉人

陸邶字秀卿嘉靖丙戌進士初授南刑曹平反訟獄與大理丞相軋白尚書奏請卒從邶議嚴嵩爲少宗伯慕其才邶拒不見嚴陰託人詢其故邶曰此人雖有時名實奸雄也嚴啣之歷陞兵部郎清聲振一時出知常德府尋調武昌徙岳州值歲飢設法賑貸活飢民數百萬時嚴啣前事十年不調御史伊敏生巡郡供奉甚薄直入其衙惟老蒼頭二人殘書百帙布衣數事而已遂疏薦陞京堂至都仍不謁嚴嚴遣其同譜

萬姓者諷諭之邨曰受職天朝拜恩私第賢者不爲
况未受官而先謁權貴乎卒不往滯京邸三年方推
太僕寺少卿轉南光祿巡撫河南未幾乞歸子敷錫
孝友和粹任柳州府通判

沈爚字世明嘉靖乙酉舉人性嚴毅跡不入公府再上
公車凡道路費悉謝弗受家居動遵古禮日闔戶手
一編與弟炤相友善所著有石聯遺稿

朱愚字汝明父鳳司訓興化歷邵武教授澹泊自甘愚
博學善詩文少負氣節曾上書規郭縣令郭引過且
表其書于門尋以貢士授松江訓導清操凜然不愧

其父

盛唐字原陶嘉靖戊戌進士授吉安司理每讞獄探幽
索隱自定爰書吏胥不能爲奸陞御史兩按陝西河
南著直聲遷湖廣憲副多善政里居不入公府優游
林下編嘉善志年九十卒

錢貞字子元號栢峰嘉靖丁酉舉人選尤溪令革蠹弊
恤孤獨遷撫州通判改開封陞維揚郡丞轉汝寧緩
征寬役民便之其在信陽捐俸薪以完逋賦西平則
均馬政以省夫役皆政之卓卓者

沈科字子進嘉靖甲辰進士官繕部治張秋河道有聲

出知臨江勤恤民隱平劇盜李文標嚴嵩子聞其才
陰令人諷使附已科正色曰某卽不材奈何以天子
臣爲相公私人遂轉苑馬卿遷河南憲副有欲爲科
謀解于嵩者科不聽嵩嗾當路論去子道原進士有
傳

王倖字廉父嘉靖壬戌進士初授職方從劉尚書燾征
曾一本燾欲誅老帥王詔倖爲解釋詔竟擒賊議馬
市忤江陵出守永州歷官山東江西叅政各有政績
好施予宗黨賴之

孫奎字山隱早孤事母孝營造三世墳塋積學好義卒

年九十三子嵐字汝瞻性孝友好施與勤於讀書不
樂仕進嵐子朝宗令順昌迎就養所行必請命三年
將報最嵐令告歸曰爾樹德于民旋養志于親兩得
之矣神宗建儲嵐恰百歲直指上請建坊朝宗字賓
江隆慶丁卯舉人令順昌廉仁恪謹有惠政歲荒傾
貲賑濟全活無算邑有私設稅關請除之祀名宦

丁寅字直原幼敏嗜學甲子游北雍旣入選復見黜因
屏舉子業遊王龍溪唐一庵之門講身心實學事父
盡孝事繼母尤順敝衣蔬食稱退讓君子

丁賓字禮原號改亭就學王龍溪闡姚江良知之旨登

隆慶辛未進士令句容清賦額減雜徭歲省民供銀米一萬七千餘兩建倉貯穀濬渠築路百廢具舉賓故張居正所舉士後擢御史屬賓往勘劉臺獄辭之拂張意遂歸講學二十年起大理丞歷陞操江都御史工部尚書久任南都葺鳳泗陵寢各殿及畱京公署橋站閘塢濬江浦河隄拓方正學王陽明二祠與諸生會講南中苦徭役定三等九則之法輸錢官募題定稅役事宜二十八條民慶更生時有劉天緒曹大遠之獄守臣倖功以謀逆告賓露章辨釋全活多人歲飢皆出家財屢賑并代下戶納稅數千割田籍

學宮百畝尤好施捨而自奉儉嗇年八十八尚詣曲阜謁孔林至九十二歿謚清惠南京及本邑皆建祠子鏞鏞鈞皆恩蔭鏞副榜貢生

錢吾德字湛如隆慶庚午舉人食貧力學博極群書署教歸安擢遷安令清操益勵再補泰寧平輸均賦民困以甦擢守寧州值歲大祲開廩賑給所至皆有惠政年八十一卒子繼登有傳

支大綸字華平萬曆甲戌進士時執政有進紅蓮白燕者初釋褐卽抗疏糾之改南昌教授造就無虛日遷泉州司理會永春民變以兵劫令大綸單騎往諭人

得自白遂縛渠魁以獻當道服其膽畧尋以艱歸著述自娛有嘉隆編年史行世子如玉號寧瑕由舉人官刑部主事審錄多平反終養乞歸著半衲菴稿

朱廷益字汝虞父建侯六合教諭性孝有德行廷益登萬曆丁丑進士令漳浦冰檠自持剖事如流歲比不登捐俸賑濟民爲建祠羅山改嘉定又遇飢饉賑恤全活無筭境內多植木棉鮮禾稻艱于漕糧懇撫按題請改折著爲令民德之鏤旃檀爲像祀婁塘擢南吏曹海瑞服其勁節事必就咨督學江西稱得人晉大理轉通政咨訪故實勒成司志時礦稅橫行疏陳

利害卒于官僚友醵金殮之著有清白堂稿

沈夢斗字應宿父存德食貧力學夢斗尤穎異登萬曆
丁丑進士令盱眙有惠政繼補常熟愛恤士民獨不
得上官意謫幕關中歷守信陽無爲恤災清稅民甚
感之卒於官貧不能殮僚友醵金歸櫬

王慎德字遂初萬曆庚辰進士始令萬安鋤強扶弱政
教兼舉擢御史按四川平楊應龍亂疏請神宗建太
子忤旨罷職光宗卽位贈光祿少卿

葉繼美字含章萬曆癸未進士授金溪令治行卓然邑
有東西二鄉東腴賦重西瘠賦輕有貴宦家于東北

倡議均賦堅持不可一時稱強項有寃獄就讞二載
廉得其情立爲平反時久旱忽雨改任蕪湖擢科垣
益諤諤無所諱如請建太子救行人高攀龍諫停礦
稅無罪言官語語切直甲午典湖廣試以題涉譏諷
削籍子培恕字行可崇禎甲戌進士初令崑山兩任
福州延平司理所至撫凋殘慎刑獄歸裝蕭然食貧
如故

袁黃號了凡博學負才名萬曆丙戌進士授寶坻令賦
役繁累積逋巨萬條奏蠲除乞減舊額陞兵部職方
主事時東征關白贊畫軍前平壤之役李如松誘倭

報捷諸將竊級爭功黃以三不可面折不撓會有幕
客馮仲纓習朝鮮事黃使往諭之倭遂服同列劉黃
裳忌功與李如松構釁謫歸閉戶著書力行功過格
尤精象緯曆法叅訂古今圖史及輿地醫卜刊刻成
書子儼字若思能紹家學登天啟乙丑進士令高要
邑疲劇以勤勞卒于官民感之立祠奉祀

陳于王字伯襄萬曆丙戌進士父卿勤苦拮据積米百
餘石歲荒出貸貧者次年復荒盡捐之于王補句容
令有循績與前尹丁賓並稱賢歷陞武昌副使時患
盜檄柯陳十二姓擒治渠魁散其餘黨數郡帖然歲

稷賑恤多全活以福臬使致仕子山毓龍正有傳
顧際明號海暘萬曆己丑進士性至孝文章風概擅一
時入庶常改御史有暮夜求援者正色却之疏指楊
應龍必叛果如其言後以爭國本遭譴時稱真御史
天啟初起太僕引疾歸置義田六百畝贍宗族婚葬
供祠墓祭祀人比之范文正云

吳志遠號蘧菴萬曆中與高攀龍歸子慕往來談道舉
孝廉三十年未嘗謁官府就教烏程造士興文歷陞
禮部司務時尚書孫慎行爭紅丸事托志遠詮次章
奏屬意用之志遠力請就閒轉南兵部郎璫禍發歎

曰吾不能如皇甫規自附黨人尚忍懷綏乎卽告歸
殫心靜悟不務著述以誠敬純一爲功武塘理學復
振子亮中字寅仲進士戶部員外贊理漢中糧儲安
輯有法軍民頌德

夏九鼎字台卿少從顧憲成學有得于姚江傳習錄乃
曰人心萬象自備不假外索萬曆間鄉薦北上憲成
囑其請益于李材材爲理學宗主官兵部受誣下獄
鼎從獄中受講元旦不輟壬辰登進士卽抗疏白其
冤辦事儀曹疏爭三王並封艱歸仍設教梁溪後補
新喻令調安福皆清操自勵多政績上計卒于道貧

不能殮平生秉禮蹈義嘖笑不苟晝所爲夜必書之
動與世違不顧也

沈道原字淮槎科子萬曆乙未進士知樂安縣心勞撫
字以病乞歸補教授歷陞助教至文選郎護惜善類
惟恐不及條陳福府隨封官及催起廢補大僚疏通
貢士壅塞一時倚重尋致仕歸

李奇珍字四可萬曆辛未進士知長樂縣定役緩征興
利剔弊陞科垣忠直敢言不畏強禦有爭國本止開
礦議營田陳星變諸疏陞太常少卿歸家居十五年
無一字入長安長樂有雙清祠與武林鄭月菴並祀

錢天胤字延之萬曆辛丑進士居鄉孝友仁恕授攸縣
令焚淫祠崇學校謝苞苴均賦役以循卓稱陞兵部
郎中

馮盛典字桂海與莊則孝沈萬鈞皆見知于邑令章士
雅萬曆丁酉錄科縣試首盛典次則孝次萬鈞榜發
先後亦如之盛典辛丑進士授刑曹守歸德和易近
民遷兩淮運使與巡鹽爭禮著爲例陞河南布政使
則孝字翼菴戊戌進士授興化推官明恕無疑獄陞
禮部主客郎萬鈞字玉臺著有詩經類考盛典孫運
隆從孫瀛秀俱舉人

毛尚忠字誠菴萬曆甲辰進士歷任海澄棗強令皆有
治績陞工部主事杜絕中貴人冒破光宗在東宮異
之書承恩堂額賜之遷雲南僉事弟尚質字素菴性
狷介重然諾季弟所居遭火代爲繕緝尚忠卒後子
幼尚質撫育遺孤辛勤備至鄉黨推重

毛尚文僉事尚忠弟博學能文已卯省試聞父病馳歸
闈中已呈薦因無第三場卷不錄後以明經授餘杭
訓導歷陞紹興教授訓誨諸生勤勤懇懇以年老乞
歸卒年八十四孫植以孝友稱

魏廷相字卿雲萬曆甲辰進士令汝陽改棗強廉能慈

惠歷有循績汝民治田無桔槔廷相示工人以式至
今號魏公車陞御史

計元勲字明葵萬曆丁未進士授龍溪令倣紫陽治法
政平訟理擢吏部郎出爲濟南叅政吏有餽金者却
之尋掛冠歸謂所親曰權璫在朝楊左輩且死義矣
尚忍懷此綬乎且聞建祠迎媚勢必及此吾不能以
清名玷也旣而濟南果建逆祠居家杜絕賓客不入
城市年七十四無疾卒

浙

曹津字元會貢生授青陽訓導歷陞南安教授課士有
程調貧生却贈賄著周禮習傳子穗字泰宇家貧至

孝魏忠節執經受業卽知爲令器研精河洛著易旨
太極通書解性理雜說尚書解詩本義諸書子勲有
傳

蔣英字瞻岷萬曆庚戌進士令松溪調漳浦廉而有恩
漳有斷腸草仇家陰借殺人英令訟者薙草贖罪絕
其種繼補宜興歷福建副使時璫焰方熾英以周宗
建姻削籍崇禎間起補蘇松道會宜興民變人情洶
洶撫軍令英往撫卽時解散子琦舉人睿有傳

錢繼登字龍門萬曆丙辰進士授刑部主事有珠商與
大璫乾沒帑金鞠訊不少貸轉郎中摘猾胥奸弊守

饒州閩帥援遼經過預儲舟楫芻糗民不爲擾修復
芝山書院與諸生講學陞蘇松副使謫歸崇禎末起
江防都御史未赴淮揚失守歸隱東郊年八十著壑
專堂集東臯問耕錄易窺南華拈笑孫武子繹等書
弟繼振貢生有才名繼章有傳

錢士升號御冷自明經時已負盛名梁溪顧端文公延
之家與高忠憲諸公研究維闡宗旨萬曆丙辰廷對
第一討習典故以名世爲已任時璫焰方熾士升適
內艱家居得免魏忠節趙忠毅等被逮營救甚力崇
禎初起南京詹事陞禮部侍郎祭告皇陵所過流亡

滿目上疏乞軫恤旋陞尚書特旨召入內閣力持大體時朝政搽切上寬簡虛平四箴首輔意主豁刻異已者輒爲排擠士升隨事挽回默爲調劑名對便殿據事盡言奸邪李璡請籍江南富家充餉士升票擬下璡法司不聽因上言巨室乃國家元氣所關周禮有保富之法今天下荒亂惟江南數郡未動奈何驅之使爲盜也不聽告歸甲申變後祝髮爲頭陀年八十餘精研易學著有周易揆一書病亟時猶有易學垂成遽爾永訣之語子棫舉人棟進士官僉事先士升卒

錢士晉號昭自相國士升弟萬曆癸丑進士授刑部主
事挺擊之案士晉佐王之案執言風癩非是幾爲忌
者所中出守大名絕餽遺時加派令下卽倡捐俸得
四萬金以代民輸繕城壕修學校積羨穀旋督餉山
海立建圃定斛法嚴覈內外士馬濬海口改陸運爲
舟甚稱便以守大名時曾薄魏廣微且擒治田爾耕
私人至是鈎黨獄起遂同趙南星諸人削籍崇禎庚
午起七省督漕更定白銀法建閘築堤以惠蘇民豁
漕欠繫弁立水次循環派兌令尋撫雲南奏備寇警
通鼓鑄築新化等六城置郵立堡扼奢安之要岑儂

交構諸孽陰挑之士晉以計擒縱反側得安卒于滇
長子梅癸酉舉人有才名與張溥張采分主五經文
字選次子棻三子楞俱有傳

魏大中字孔時號廓園性耿介諸生時從高攀龍遊以
道學爲已任萬曆丙辰進士徒步觀政官行人奉勅
封代藩使福藩減廚傳絕餽遺擢工科搏擊權要轉
戶科奉差山東盡釐夙弊郡縣謝薦者拒不受先後
蒞官未嘗攜家晉吏科主計發霍丘鄭知縣餽時葉
向高爲首揆趙南星位冢宰高攀龍楊漣左光斗居
憲院仁賢布列大中身任激揚謂太平可立致而璫

禍作矣傳檄首搆汪文言事竄名誣奏大中方抗辯
會漣攻璫二十四大罪璫疑疏稿出大中且合同列
公疏擊之禍遂不解晉撫缺廷推謝應祥趙南星群
小以謝昔令嘉善于大中爲師生遭放逐未幾逮至
士民呼號大中慰止過錫山高攀龍勉以不辱臣節
先是遼陽失守廷議熊廷弼貸不死大中爭論如法
後反誣大中受熊賄矯旨下鎮撫司考訊榜掠殞獄
崇禎初贈太常卿謚忠節建崇禎祠制詔有至清絕塵
大剛制物可以貪繩蟬蚓肉視虎狼之褒一生行事
詳公自著年譜子學泚學濂皆有傳泚奉詔配食

周宗文號開鴻萬曆丙辰進士初知清江有惠政擢御史值冰雹災上疏陰斥閹官會議三案抗聲曰紅丸與木棍如出一手罪同罰異非法也忌者以其言羅入要典幾陷璫禍適艱歸崇禎初陞光祿卿

陳山毓字賁聞萬曆戊午解元敦倫好善恬懷雅度居必掃室焚香左圖右史務在洗滌嗜欲不愧衾影尤善騷賦爲世所宗年三十八卒子舒進士副使

李奇玉號荆陽奇珍弟從高忠憲學精于易天啟壬戌會魁聞母病榜未發卽歸連丁內外艱嘔血幾斃崇禎時任汝寧守不能迎合上官歸時朝堂門戶相持

獨奇玉超然不與講學論道以終其身著雪園易義

子松進士歙縣令

卞洪載字子靜少從高忠憲得性命旨遂不應試以不誠無物爲入門存心察理爲進步未發不容把捉發後不用安排爲究竟鄒元標葉向高皆重之講學郡城天心書院忠憲北上招主東林講席及被難守而勿去崇禎間徵辟不就著持敬省察約言綠雪軒集周丕顯字知微舉人敦孝弟重氣節天文地理兵農禮樂諸書洞悉源委邑中有大興革皆折衷之七上公車不仕自號梅居士

葉時芳字瑤華舉人篤學力行至老不倦授唐縣諭訓士嚴而有法擢安遠令愛民禮士人不敢干以私

曹勲字允大崇禎戊辰會元研討今古爲文有法從高忠憲攀龍論道魏忠節大中被逮釀金賦詩伺者在側勿顧也授庶常數月乞歸省母尋侍經筵進講歷官禮部侍郎掌院學士時門戶角立言官交惡勲持正多齟齬請告終養晚隱東干名東干釣叟子爾堪爾坊有傳

陳龍正號幾亭于王子少穎異師事高攀龍崇禎甲戌進士授中書戊寅五月熒惑守心連進四疏言事天

無過好生致治當責成宰輔時盜賊四起籌餉無策
上墾荒議反覆數千言朝議不決乞歸居鄉搯履冰
潔破產賑荒著有幾亭全集子揆字子衆修字子近
皆研理學

柯元芳號楚蘅崇禎丁丑進士授建寧推官平反甚衆
人呼爲佛勦除麻靛柘浦諸劇賊舉卓異會時多事
不出居鄉溫厚有古人風子聳有傳

夏允彝字瑗公萬曆戊午舉于鄉築廬橫雲山著述垂
二十年汲引後進遠近知名崇禎丁丑成進士令長
樂搯守嚴介善決疑獄定賦役勤賑恤陞考功主事

廉靜執法告歸營墓已絕意人間從汨羅終子完淳
字存古八歲能作賦十六著文集數十卷遭難棄市
臨刑談笑如平時人稱其父子不愧烈士

孫在鎬字西自父枝良遊成均有聲博聞廣記以孝友
稱在鎬十歲通經史登丙子舉人閉戶潛修天性純
孝幼出嗣本生早世請于宗族終制事嗣親養生送
死備極禮節疾作呼子孫於前焚香端坐而卒祀鄉
賢贈文林郎子衍舉人任長山令孫霖五經舉人

錢繼章號菊農中丞繼登弟崇禎丙子舉人文壇詩社
推領袖繼登遭謠詆經營護持晚年閉門著書園名

谿默著詩賦古文辭數十卷繼登嗣子士壯貢生亦能繼家學

孫朝宁號賓瀾貢入北闈兩中副車授廣東別駕兼清遠篆鋤奸雪冤恤災行賑陞肇慶同知生平孝友端慤清真自矢有拒艷還金讓產救厄諸事著性理約史嚴尊素堂集子繩祖字葵菴任丹陽丞廉能著績陞安慶郡丞繩祖子棨開州知州

郁調元字涵真性孝隣家失火從烈焰中負母出踰垣涉河兩踝皆裂由國學儀封丞司河務濬築盡瘁河不爲溢葺請見亭爲士子絃誦之所遷遼陽叅軍儲

糗糧廣芻牧召丁壯給牛種耕具墾田萬畝鄉人有
戍遼者厚給之無德色祀儀封名宦

魏學濂字子一大中子崇禎癸未進士逆璫誅斥詔優
卹冤死諸臣濂刺血叩闕訟冤白兄學泚死孝劾阮
大鍼傳檄制詔褒美濂自少究心天文地理韜鈴律
法暇則習射演陣期以身死國選庶常會闖陷京師
作絕命詞自縊爲人慷慨好義豁達多大畧工詩文

善書畫

沈泓字臨秋崇禎癸未進士幼孤母宋青年守節泓六
歲時臨父手書痛哭經書文義皆宋所指授弘光立

嘉興府志 卷之十四
累招不赴曰我君親兩負惟有削髮投世外耳遂從
雪嶠印證改名弘堅入雲門山有死不歸家之誓奔
叔喪一哭而去孫業舉人

孫聖蘭字子操崇禎癸未進士性恬淡無意仕宦偕友
結花社閉戶著書三十年有兼山草堂集長溪詩話
徐遠字屆甫宗禎癸未進士葛巾褐衣蕭然環堵有遙
集編

沈德孚逸其名隱于農衣敝履穿不爲困究莊老乾竺
諸書後盡棄去一意探索程朱施約菴張考夫極相
引重每講會輒相邀足不入城市惟講學自刺舟來

會畢竟去古貌古心稱爲有道君子

夏允懷字季思貢生早歲博學能文與雲間夏允彝爲
雁行稱二夏行已方正嘗館一巨室坐構釁幾殆允
懷悉力捍衛全其幼孤著有尚書句解四書句解歷
代史斷

錢華字平路邑庠生甲申變後棄制舉授徒允邃于易
臯比講學弟子雲集爲人和粹肅穆稱鄉邦遺老以
上壽終

孫鏜字聖修諸生事親愛敬備至撫兩弟恩義兼盡年
八十四以嗣子舉人行贈長山知縣所著四書辨疑

禹貢廣註及百穀堂詩文集爲士林傳誦

國朝

錢棻字仲芳中丞士晉子崇禎壬午魁北雍流寇披倡
閣部史可法招致幕下不就時閣學士升二子歿立
棻爲嗣卯翼從子兩世彌篤博通墳典鍵戶謝客著
書大滌山賦詩作畫遠近無不瞻仰年七十八著有
熹宗邑乘讀易緒言莊子緒言諸書子黠爍黠進士
孫兆基以陞隆墀勝圻俱諸生

張茁字文葭順治壬辰進士孝友性成讀書刻苦家貧
四世不異爨兒芷蚤亡撫其子如已子歷部郎出爲

安慶守政平訟理清介自持開荒田二千餘頃繕城
練卒境內帖然其請蠲請賑諸書民頌之流涕

錢楞字芄生原名禎貢生中丞士晉子隨征入閩授將
樂令邑當水陸衝兵燹後巷無民居楞勞來安輯流
移漸復時山寇攻城率鄉勇登陴防禦無兵無餉堅
守數月請援不至城破率家丁巷戰手刃二賊馬蹶
被殺家丁從死數人祀名宦子煥有傳

柯聳字素培號岬初推官元芳子順治己丑進士任棗
陽令歷陞科垣一十九年疏五十七上如陳江南漕
米貼贈免其徵給浙江漕截應行節減請捐康熙五

年以前民欠確勘蘇州水災恩加蠲恤請將江浙折漕銀充劉河吳淞工費請春秋試題兼用四傳停止合傳題目請方孝孺從祀文廟諸疏皆縷陳民困剴切詳明內陞通政叅議假歸

孫籀字殿英號潔初順治己丑進士任山西學道號得人大學士吳璵陳廷敬侍郎田六善皆所拔士也尋補福建糧道時廈門用兵先時籌餉以給軍糈歷寧夏安廬南汝道所在皆有政聲以病乞歸子復煒昌黎知縣

郁之章號衷恒順治己丑進士任福建漳南道減河稅

除鹽課重葺王文成書院應詔陳三事歷陞大理寺
丞子褒峽江知縣

沈熹字季子號止岳順治己丑進士隨征入粵授肇高
道蒼梧被陷獨守孤城二載又平洞荷諸寨山賊口
不言功陞福建海道築堤防通水利廢墜悉舉

曹爾堪號顧菴宗伯勲子順治壬辰進士選庶吉士讀
書過目不忘下筆風發泉湧分校禮闈號得人歷陞
侍講學士罷歸恬靜寡欲以山水詩酒自娛西陽羽
陵所藏叩之如懸河便便腹笥人莫能及侄鑑倫少
孤撫之成立獎掖後進無倦色所著有南溪詩詞文

略子鑑平有傳鑑章萬載知縣

魏學渠號青城順治戊子舉人授成都府推官時蜀中
初定招撫流亡綏輯兵民事事得宜定嘉眉邛雅四
州賦額公私稱便陞刑部主事改定例過嚴者數十
條歷陞湖廣學道江西湖西道務從寬簡屬令有苛
政劾去之與王阮亭田紫來相倡和生平輕財好施
桐城錢澄之與學渠交最深感德不忘名其樓曰懷
青

丁鑛字九貢清惠公賓之子辛酉副榜清惠家風儉約
鑛能繼之而施予無恹色常鬻田爲族人償逋賦邑

舉鄉飲以父諱賓辭不就其孝謹類如此子穎淦字
茲免諸生嗣徵字集虛裔沈字函巨俱監生穎淦天
性純孝至老無間究心先儒語錄丹黃不倦子棠發
宰新安鐫和平二字於印章以勗之清惠公年九十
鑿八十七穎淦九十三人謂盛德所致嗣徵慎言寡
交好遊山水裔沈工詩文有香湖草堂集二人學生
佞佛有丁氏雙佛子之稱穎淦次子祖植舉人

夏長泰字季保順治乙未進士家貧力學授文水令擢
部郎值海塘壞江南撫臣急議築堤以長泰廉幹請
視工任事勞頓病卒

周宸藻字端臣御史宗文子順治乙未進士選庶吉士
改御史屢陳時務一請禁旗丁勒索一請清查倉穀
一請嚴覈知府政績所言皆切中窾要巡視兩淮鹽
課罷歸課子讀書門巷蕭然

蔣玉立字亭彥拔貢少從張西銘遊講求實學慷慨好
施父芬有疾夜侍不解帶藥必親嘗五六年不懈詩
文力追正始所著有泰茹堂集弟雲翼字鳴大初名
會貞甲午舉人涇縣知縣璩字禹書辛卯副榜俱有
雋才敦友誼有武塘三蔣之目璩所著有三徑草靈
威集子昌陞有文行

楊應標字勝林順治乙未進士授寧國推官歷溧陽鄆陵合牧劍州俱有惠政可紀孫爾德會元庶吉士

魏允柟字交讓忠節公大中孫學泚子忠節被逮至吳門周忠介公過舟中相慰勞以女許字其孫卽允柟也廕入南雍晚年閉戶讀書慎于取友所交皆東林後人後輩有所質問必誨誘不倦家極貧非義不取事母至孝其歿也門人私謚孝隱先生著有維風集

明倫彙編小抄詩玉詩穀諸書子儒照字超宗才藻縱橫

考授知縣

計善字廉伯天性孝友師事施約菴篤志理學每談經

史如引繩貫珠詩文雄壯當道幣聘辭不赴弟能敬
正法辦計氏昆玉六人皆博瞻人稱為學者

顧耿臣字奕聞順治戊戌進士鄆州知州兵燹後加意

撫綏陞刑部員外郎中守大名有慈祥之稱子秉均

監生以詩文稱於時勤墉兩任靈璧東安令尤工書

法

李振宗字欲仙康熙甲辰進士授陝西禮縣令政平訟

簡以卓異陞戶部主事歷員外郎中陞平涼通判子

允符御史

錢霞字赤城康熙庚戌進士授山東冠縣令勤關墾興

文教改承德縣守將遷上陽堡徙民分戍大噪府門
震單騎曉諭咸帖然其得民心如此

錢煥號愚谷中丞士晉孫將樂令楞子少孤好學事母
孝母有風疾幾不瘳煥善調護壽至九十修學官置
墓田多倡義舉入太學屢試不售息影巖壑長子太
僕以塏任州縣時迎養不赴惟一至東莞登羅浮絕
頂而還人服其高致年八十一卒封給事以清白二
字飭以塏無忘世守所著有息深齋集次子以塏庚
午舉人質敏學裕兼工書畫以塏有雋才早卒

曹鑑倫號蓼懷侍郎勲之孫康熙己未進士選庶吉士

歷陞吏部侍郎少負文名居官公正典山東順天試
多知名士子源郁貢生源郊庶吉士源邦舉人

沈辰垣字紫翰康熙乙丑進士授庶吉士歷陞侍讀學
士甲戌分校丙戌武會試總裁俱稱得人辰垣未第

時師事陳蓋謨傳天文五聲書數之學奉勅緝閱

等韻三書標摘差誤每言吳興識四聲而不識七音
失三韻之原四聲爲經七音爲緯辨甚詳悉子銘孝

貢生銘慎陳留知縣

浙

丁棠發字燕公清惠公曾孫康熙戊辰進士有文名好

汲引後學授廣東新安令以才能陞御史

陳霆萬字紫馭壬子舉人父奇歲貢以文行重里中霆萬少有聲名與從伯舜薦同操選政風行海內兩弟早孤撫之如子選蘭溪教諭多士景從甲戌成進士授山東臨朐令裁革私派設法賑荒鍾之枚與霆萬壬子同舉于鄉任教諭亦稱職

魏允札字州來庶常學濂子才充學瞻少爲諸生不怠榮進晚歲好衣道士服子早世以姪孫斗南爲孫預辦後事允札視之怡然會故舊卒無以殮輒舉所製衣棺贈之屢製屢贈以爲常著有東齋詩文集弟允桓有傳

魏坤號水村己卯舉人父文煌能文稱隱君子坤持已

正臨財廉詩文敏妙著有倚晴閣詩鈔水村琴趣

張王典字堯若康熙丁丑進士少時父病刲肱和藥宰

山西平順勸農興學井里改觀歷陞吏部員外張太

宰鵬翮嘉其清慎適審江南叅案奏請隨行判決諸

案悉中肯綮未復命卽應異數以科員用敝衣羸馬

清介絕俗

孫衍字宰工康熙甲子舉人授長山縣令減羨耗賑窮

困民感其德以疾歸里士民攀畱數千人有廣川去

思錄并建專祠祀之所著邑乘宗譜經史集成傳世

許湄字臨洲康熙庚辰進士知湖廣石門縣苗蠻雜處
開誠撫諭諸土司威格心向化宗伯陳清端公特
薦司農趙公申喬保奏內名卒于道居官十五年家
無寸椽尺土歿後人益信其廉介子王謨甲午舉人
王猷癸巳進士編修

浙江圖



浙江圖書館

王猶突身壯士
 辨才終入土
 無所景徵公
 開地無備
 特民中

孝義

明

凌孝子失其名年弱剋父以典稅被誣逮繫京師孝子號慟上書遂得釋艱苦備嘗竟以是殞

陸琦字公璐宣德中將建學琦承父坦命獻隙地復創義塾於汾湖之陰學士曾鶴齡爲之記

支茂字宗衍幼孤弟榮甫三歲母陳守節教子母歿茂遵遺命不析居異財歷四十餘年後貢吏部授樂安丞奉府督租有鬻女以償者茂代輸之女繪像祀焉子立正統中舉人

周玘景泰中人兄當戍五開玘年十七慨然請代父兄
不許有司亦難之玘曰家貧役重非兄侍養莫慰親
心請益力官不能奪及之戍業裕嗣昌人以爲孝友
之報

江吉字季貞成化舉人江西平鄉令有政績解組歸養
朝夕娛親色養倍至孫蘭

章普音華工也母徐氏患傷寒瀕危普音割股肉爲羹
以進遂愈後母歿刻像以祀終身茹素誦經

顧昌鑷工也母年八十餘患痢且草昌日就里中真武
祠祈禱願以身代母病日甚乃操刀入祠剗胸探其

心不覺刺旁其哭爲羹母已不食數日聞羹香食之頓

心不得割旁蹙爲羨母已不食數日聞羨香食之頓
愈昌年九十餘乃卒

鄒昊字孟昭母年七十因夫杲故哀慟喪明延醫療之
不得效昊朝夕禱祀祈以身代俄而母兩目中各重
生一瞳復明如故人謂孝感云

王周官字存朴幼有孝童之目母疾中夜起祝願以身
代事後母得其歡心隣有以室售者旣倍價而復據
之致興雀角周官出私錢俾滿欲而止艱于嗣夢神
人昇以佳兒遂生佐成進士官知府

沈概字一之事父母竭孝養居喪蔬食三年卧起不離

於次家居考定四禮多取文公家禮爲則尤嚴于喪祭一時稱其好古執禮在邑庠當貢輒讓其次最後貢至京授江西布政司都事有古人風

陳謨字昌言父吉應廷試卒于京謨扶襯歸哀毀骨立曲事繼母以已所置產與父產均爲二析之繼母弟皆感動晚年應貢不仕

沈稱字子德苑馬卿科之弟博學有聲兄弟自相師友十試不售事親盡孝遇事必長跪以請科謝政歸雍睦承懽寢食必共家有二狸各育而共乳人以爲孝

感云

蔣裔字隣江性仁孝守然諾與人交無城府舉腴產讓
兄奉兩高堂拮据其旨歲凶發粟賑饑待舉火者甚
衆甲寅倭變里人爭走避皆遇害裔將出一犬啣其
衣若留之者遂不出得免於難一夕渡泖衆皆失風
裔忽見蘆埂環阻舟遂泊咸謂敦行行善之報孫茂
英有傳

顧態字汝美性孝友少喪母父納一婢態敬事之積館
穀置田百畝與婢二子均析之父死婢就養于子態
泣留曰我少喪母不能盡一日養父之所愛亦我母
也父所遺物悉分兩弟養婢終身他若拒婦還金大

節凜然以貢授涇縣訓導比還士有泣下者子際明
有傳

錢繼科字忠所知貞孫父病逾年察色聽聲夜常數
十起居鄉好行其德寒予纊饑予糲病予糝道殣予
糗贖故人之子助疫死之喪却祖姑朱氏之別業善
行班班不可殫述子士升狀元士晉中丞

丁鉉字九玉入太學補光祿丞以父病不之官萬曆時
大祲傾囊以濟衣食醫藥日不暇給蠲良田五十餘
畝脩學宮春秋祀事朝議旌獎之

朱國望字士翹幼失怙每篝燈夜讀輒泣數行下及長

師事高忠憲研心理學萬曆乙卯舉于鄉益勵清節
所居窪土不粒倡率開墾遂成腴田歲饑發粟賑濟
遇故人子特厚子顏復舉人曾省有傳張銘進士

郁本宗字子序號和川生有至性好讀書貫穿經史入
國雍父鈇病遍求良醫訪古今方書治之不效乃虔
禱於神刲股肉以進未痊再刲鈇甦夢神錫齡一紀
孝養盡權逾十二年果卒居喪哀毀服闋選吉水丞
攝本邑篆葺文信國祠講學賑饑稱慈母孫之章有
傳

倪津字雲橋生平孝友樂善好施萬曆中遇水旱散粟

施糜劓午莊橋建菩提菴六旬外連舉四子官給冠帶旌之年九十卒

沈春山字愛梅事親孝好施予有鄉人鬻女償債山毅然代償損貲築斜塘環秀橋凡義舉皆爲之倡

顧朝樞字仲執天啓辛酉舉人性嗜學少有雋名識者目爲神駒尤篤孝友子耿臣有傳

葉承芳字伯華天性孝友有才畧由吏任武城丞時縣有劇盜屢勦不獲御史知芳委捕擒其渠魁脅從遂散以功陞六安衛經歷甫到任聞父病辭歸孝養數十年

金文遠字鳳山慷慨好施有故人負千金以其貧竟焚券歲役施粥米活饑民無數里黨尤被其德

郁性善字承泉天性至孝父京病疽吮之立愈父觸怒豪貴遭冤獄善千里白父冤跋涉成痼疾謂其子曰父母全而生我我以父故致疾天若憫念自當復愈疾果瘳

魏學洵字子敬忠節公大中長子少稟異姿詩文爲名流所推服沉研理學嚴于義利貞邪之辨忠節公被逮洵徒跣攀號隨侍忠節曰覆巢有完卵乎父子俱碎無爲也乃微服間行尾緹騎探起居抵國門邏卒

四布匿邸中晝伏夜出與二三道義商萬死一生計
時榜掠益毒度無生理欲搥登閭刎闕下徒死無益
且父死孤魂無托所誣追賊必累老母弱弟遂飲泣
扶襯朝夕號痛未嘗入寢室哭而病病復哭每至丙
夜淚盡血枯家人以漿進却之曰先公在詔獄中誰
半夜而進之漿者竟死崇禎卽位上聞伊弟濂復刺
血白寃遂詔配祭忠節祔葬伊妻嚴氏年二十七截
髮毀顏終身蔬食撫孤成立事姑錢淑人盡孝先淑
人卒淑人曰父爲忠臣兒爲孝子婦爲節婦我何憾
焉

孫紹祖字君裘遊北雍爲倪元璐楊廷麟所嘆賞母病
目刺血書金光明經障瞽頓開繼得危疾禱北辰祈
代凡四十九日而甦咸稱孝感

葉守德字小江事親孝與弟守禮甚友愛自置田八十
畝父母議分爨德慨然均分且時以財給其弟子翹
拔貢爲昌樂令

孫應文字懷川事母孝母病劇割股以進立愈爲人忠
厚誠慤里黨負財不償者檢券焚之至家貧壁立無
悔每云作善者天必降福吾子孫苟成名立業正不
在一時貧窶子籀果成進士

孫世選字在公性至孝所得館資必奉父惟所欲爲與
兄甚友愛凡取與忘爾我父母俱年七十一日同逝
選一慟而絕

陸維祺字九如以孝行稱于鄉弟歿撫姪息逾已子贖
鬻女葬故友郡邑難處事身任之不辭孫榮登康熙
庚戌進士令英德以才能著仕至四川學道

蔣茂字鄧林副使英之兄十一歲喪母哀痛幾絕任中
翰奉使焚告孝陵過山左歲大稔老稚呼號携數百
口南還給養全活故事謁陵必守陵監親捧盤匱使
者盥手奉爵時監欲令小監執役茂以太祖式臨地

臣職豈敢隕越卒如舊制辛巳旱蝗出粟賑濟冬施
襦夏施帷死無殮者施槥歲以爲常陞工部郎中弟
蔣芬蔣字若子貢生性孝友所居火從烈焰中負父
出妻新媿勿顧常買婢詢爲士人女遣之芬字去華
監生魏忠節誣賊捐貲代納啓聖宮圯獨任修葺歲
饑貴糴賤糶全活甚多芬子玉立有傳

沈大政字爲吾性醇謹事親孝待庶弟有恩曲體父心
讓已所置產與弟遇人急難常救卹修家譜創祭田
晚年慕周鼎支立爲人構南桐書院以自娛號清修
六友蓋指桐荷蘭竹梅也

郁期字幾先郁際字兆先兄弟敦倫尚義族黨中有三十未娶者婚之三喪未舉者葬之崇禎庚辰歲饑出米百石以濟後患蝗復施三月全活甚衆

王任相字爾玉日積籌記善事有餘貲卽分親故有貸者歲歉勿責償更應之鄉人有鬻子者焚券給之貲生平信義不移排解立決子辰舉人

徐爾穀字似之尚書石麟從子石麟殉國報忠寺僧以木櫃盛之炎暑將及一月事定爾穀載至祖塋具棺殮啓櫃顏色如生握手沒爪鬚髮怒張後爾穀死于江寧妻孫氏聞之棄手抱女赴水死中立不仆人以

爲異

李標字子建精于軍律壬遁諸書史道隣閣部辟爲記
室見事不可爲馳歸里繼聞史亡渡江葬其衣冠于
梅花嶺繞屋皆種梅賦詩三十首自比於西臺慟哭
云

國朝

錢斐字子輔祖繼美字成所江寧丞陞叅軍還亡友千
金之寄以好義稱斐少聰穎八歲賦白燕詩里中傳
頌登順治壬辰進士痛從兄梅慘亡撫其孤再世無
間築託園于東郊扁舟往還意致蕭然

毛士龍諸生字伯乘素行坦易初嗣伯尚患後伯舉子力請歸宗諸所分授堅辭不取屢試不售杜門教子弟士麟恬雅雍和兄弟自相師友無間言龍子蕃麟子正學有傳

程光祖字宏先五歲而孤事母孝晨昏溫清不失時刻母病衣不解帶目不交睫母歿哀慟屢絕歲除之夕卧墓傍天明拜謁乃返平生償金焚券急難重義尤篤宗誼周濟無吝色亦無德色

王璋字啟明少有至性母病籲天割股暈絕者再事兄甚恭能治生慨慷不事錙銖親友匱乏求無不應蝗

災鬻產賑濟遇土寇劫掠村里過璋門相戒無犯

沈受祺字憲吉少與錢吉士選同文錄吉士死以生平
文稿授受祺後呂晚村求先代遺文受祺以錢文並
已稿遺之晚村選刻沈氏世籍厚貲至受祺中落然
邑有義舉賑饑施粥罔不爲倡邑令莫大勲行均田
均役官收官兌法皆祺條記贊成著清賦平役新書
臺省頒爲例居北山草堂有九松皆千百年物亭館
幽勝曾孫培種進士

陳華育字雲從好義樂善居清風涇葺治橋柵不辭勞
費冬月施衣貧無棺者助之子培字用楫康熙丁巳

舉人廣東高明合值水患籲請蠲賦發粟縣有低田
捐俸築堤民賴以安

戴大用字聖萃敦孝友重然諾樂善好施布衣蔬食舉
鄉飲賓

張邦豫字立生膠州同知元之孫也性至孝好濟人築
九里灣塘二百五十丈建橋梁十有三辛亥大荒設
粥賑濟督修府縣學當事旌之

張鴻隱字柯山性至孝父文光爲毒蛇傷足成痼疾不
能步履鴻隱晨負其父至堂洗瘡傳藥晚負之安寢
而後退數十年如一日家傳幼科活小兒甚夥子孫

隱逸至今傳其業

吳薰字曰放府庠生好學立品歷試不第居家克敦孝

友見義舉尤勇于爲舉鄉飲賓

丁策康熙乙丑進士知昌黎縣慈惠得民人稱長者

金臯謝康熙戊辰進士莆田令居官勤慎以親老乞歸

張元默字識菴爲人醇謹里稱長者子垓字環海性孝

友更工文章

浙江

館

書

圖

嘉興府志

今身... 文進士甫田今... 官... 懋... 以... 際... 步... 子... 體...

丁... 張... 吳... 至... 今... 其... 業... 年... 如... 一... 日... 家... 傳... 幼... 科... 活... 小... 兒... 甚... 夥... 子... 孫...

張... 吳... 至... 今... 其... 業... 年... 如... 一... 日... 家... 傳... 幼... 科... 活... 小... 兒... 甚... 夥... 子... 孫...

吳... 至... 今... 其... 業... 年... 如... 一... 日... 家... 傳... 幼... 科... 活... 小... 兒... 甚... 夥... 子... 孫...

至... 今... 其... 業... 年... 如... 一... 日... 家... 傳... 幼... 科... 活... 小... 兒... 甚... 夥... 子... 孫...

隱逸

明

袁仁字良貴祖灝父祥有經濟實學仁業醫謂可以濟人崑山魏校疾延仁勿往謝曰君以心疾名當咀仁義炮禮樂以暢君之精神不然雖十至勿來也卒之日沐浴更衣呼筆題詩有附贅乾坤七十年飄然今古謝塵緣之句子黃有傳

沈濡字子雨多隱德九歲喪父事母孝屏迹林泉以讀書敦本課子孫足不履城市者四十年

孫養濂字浴凡性恬靜尚義輕財授江西安仁訓導稱

疾不赴郡邑高其風節兩舉鄉飲賓

郁鈇字民威父瑾手植四槐于門稱槐里鈇性伉直以詩文自豪郊外築小圃植梅駕小舟日遊泛其間卒年八十二子本宗有傳

何浩然字希孟諸生師事袁了凡留意星卜所居一室惟著草竅爐酒瓢詩篋而已張翼字羽升家貧嗜學熟韜鈴符讖書有膽識技勇絕世與浩然友知天下將亂崇禎初游三山不知所終

盛于焯字犀然諸生十歲爲制義長好古學博覽羣書終身不忌性剛介鮮交與所居屋敗亦不介意著述

歎軼僅存孤嘯一集

駱雲程字天游好讀書不事舉業以詩酒山水終有素
券堂集列入十二代詩選年九十餘卒

吳祖錫號稽田崇禎壬午副榜痛父死門戶毀家紓難
奔走南北不敢寧居所交皆海內高隱士死于濟南
子濩歸葬焉濩號于東敦行誼有先友詩一卷

張甫字伯宣諸生前太守詹拔爲七邑冠軍甲申後棄
舉子業閉戶讀書常輯宗譜創祠置產爲闔族首倡
生平不茹不吐樂善好施壽九十無疾而終子兆治
庠生能詩文精醫嘗客嶺南與丹霞今釋西冷陸圻

友善先甫卒

國朝

徐之麟字白峰品格清雅談笑風生人謂坐無白峰卽
不樂書法仿二王少工畫及游粵西歸覩湘南山水
奇勝筆法益進詩亦瀟灑絕俗

曹燭字舒光諸生順治初卽棄舉業兄無子撫甥陸侍
御弟爲嗣擬服本生燭準以恩義數百言侍御無以
易嘗風雪中遇覆舟夫婦督長年力救脫綿衣二襲
衣之不告以姓名三黨貧者每待以舉火著有鈍留

齋集

文苑

明

吳儒字汝爲積學工文門下皆名士貢爲儀真訓導歸

田閉戶吟誦蕭然適也孫志遠有傳

郁袞一名天民字九章讀書過目不忘鄉試掄元以小

誤報罷益肆力于古文詞爲詩援筆立就博極羣書

尤熟國家典故袁職方稱其長于記事有史才

孫茂芝字若英性情恬雅博通經史閉戶著書不輟寒

暑以副榜貢選沔陽州同知有循聲著有讀經疑離

騷繹研枰齋稿等集

支如增號小白司理大綸子工制義抱經濟才與京山
李維楨華亭陳繼儒錫山鄒之麟爲文字交嘗上書
岳司馬元聲指陳朝政又貽書賀吏部燦然謂駁永
陵年史之非後奉母高隱有司聞聲枉騎引去不顧
著有硯亭小品濡削叢笈三十種子隆求舉人揆英
拔貢遵范庠士

陳揆字子衆言行端慤節儉自謹好周人急歲旱設法
救荒少善病絕意進取專心學古于經史多所發明
晚歲研心性理著有省心日記

郁泰徵字參吾父耀宗食餼負盛名與從兄本宗應元

敦易下帷切磋時泰徵爲諸生與馮盛典及從兄調
元同硯席多所發明從子之章少孤值家難護持得
解著有松筠堂詩文稿

館

錢格字去非後更名栻弟棟字仲馭相國士升子格崇
禎庚午經魁座主黃道周絕曠賞之黃下獄格隨侍
供橐饘少離所居息園鍵戶讀書稱真孝廉棟丁
丑進士授南職方釐剔夙弊中涓有所撓正色糾之
轉文選郎尋改廣東僉事適伯兄格故遂請終養與
桐城吳德操錢秉鐙萊陽姜垓以詩文相唱和國變
後誓不欲生湘水招魂有餘慟焉格子燾廕中書

錢熙字漱廣弟默字不識孝廉梅子熙諸生簡默不尚
紛華詩宗漢魏早卒默讀書日數千言八九歲能詩
文登癸未進士授光澤令補嘉定有強項聲開劉河
籍役賦功民用不擾以母病棄官歸父梅歿後芒鞋
箬笠不知所之有僧自越中來知己爲僧稱霜華道
人由黃山至雲門卒于顯聖寺有吹簫草默生長王
謝忠孝性成野鶴孤雲身如敝屣不媿祖父不負科
名

浙

朱會省字魯叅國望子崇禎丙子舉人博覽羣書采掇
精英清詞麗句擺脫一切尋常語後進經其指授罔

不成就甲申聞變聲淚嗚咽哀感行路未幾病卒
陳舜薦字羽格諸生博學嗜古操選政評隲一出坊賈
紙貴性高簡卜居郭外種梅百本不問世事高致不
可及

國朝

曹爾坊字子閑侍郎勲子聰穎力學工書畫髫年應試
宿儒不能及與兄學士爾堪有元方季方譽子鑑倫
有傳

沈煌字火文選貢工詩古文倡明程朱絕學四子五經
俱加闡釋遠近負笈從遊三百餘人學者稱爲弘益

先生及門李年實篤志勵行深得其傳

陳增新字子更順治戊子舉人恬靜寡欲無他嗜好惟
詩古文自雄喜結納客至論經史夜分不倦授安仁
令有惠政

魏允枚字卜臣庶常學濂子順治戊子舉人淵源忠孝
工文章勵志行父殉難匍匐迎櫬哀毀倍常撫教二
弟讓以產授西安教諭

魏允桓字虎臣忠節公孫庶常學濂子性孝友少失怙
事其兄如嚴父侍母湯藥至于嘔血百家之書無不
徧覽爲文風發泉湧前輩俱謂其詩文書法不媿爲

名父之子云

李煒字赤茂諸生研窮經史辟易時輩屢躋鎖闥益肆力於古學陰符握奇無不考究子光堯負才磊落應機杜門著書皆師當湖陸公隴其稱高弟人號二難沈湛字淵伯諸生博聞強記鎔經鑄史老而不遇賣文爲活別爲一帙曰百一集謂存什一于千百也舍傍有五柳人呼五柳村所著有易伸

顧瑄美字輝六諸生胸中浩博下蒸麗邑人數能文者首推沈顧謂湛及瑄美也歷遊齊晉燕粵詩文盈帙又有咏物詩少宰曹鑑倫業師也

毛蕃字穉賓少與從弟正學字羲上楠字讓木掉鞅詞
壇人稱毛氏有三俊蕃戊子副榜下筆數千言立就
談說古今四座聳聽正學增廣生高才守繩尺重交
誼好施予老困塲屋制義爲人楷式楠諸生中年隱
居授徒學有根柢蕃子灃監生正學子璐貢生楠子
永圖諸生亦以能文世其家

葉翹字敬已戊子拔貢山東昌樂令潔已愛民遇事勤
慎學宮頽廢捐俸倡修歸里後惟閉戶以著書

胡清字玉史邑諸生安貧樂道嗜古學學者爭負笈每
訓及門云思之思之鬼神通之不患不及古人也工

篆隸著古文廣註行世

蔣睿字正言副使英子幼孤事母盡孝爲諸生卽棄去
不屑章句之學詩文自出新意仲兄及姪早亡兩世
四喪獨力經理撫孤甥爲之婚嫁宗黨不足者常周
給之

曹鑑平字掌公學士爾堪子壬子舉人汎覽六籍歷其
闕與屢試南宮不第士林惜之

陸淮字秀壑諸生四壁蕭然讀書不輟長于詩詞子又
嘉又吉俱敏慧父子授徒自給安貧力學邑人稱之
周振璜字渭陽貢生弟振瑗字蘧玉甲辰進士山西安

邑令季弟珂字越石貢生文章行誼一家自相師友
門多負笈環堵蕭然兄弟俱工詩振璜尤工書法

柯崇樸字寓匏副榜中書弟惟楨字翰周舉人考授縣
令俱銀臺聳子刻苦力學有文名以好客好書家計
日窘兄弟怡然不以介意

孫洙字魯淵剡臂療母人稱其孝舉乙卯經魁授臨湘
令崇尚教化不事鞭朴卒之日貧無以殮士民贈賻
扶櫬孫琮字執升同洙評刻山曉閣古文行世
葉汝詵字廣基康熙戊午解元究心經籍不與外事日
與知交談文論詩戶屢常滿

王份字季隆康熙辛酉舉人攻苦力學時輩咸推服姪
錦雯鉉俱舉人皆以篤行聞

蔣廷棟字蒼符敦行立節著述三十年闢澗松書屋終
日吟嘯其中儵然自得著有盟鷗集

龔廷鈞字肇權孝友父在明歿始析居讓宅與弟母病
屏息伺起居坐卧榻前五年不歸寢鄉黨稱純孝通
今古有文名著有嶺雲賦草穀詒堂詩集古文小品
前後三集

朱岍登字道勇才藻橫溢康熙丙子舉人閉戶讀書不
事徵逐早卒父之榮仗義好施從祖璣諸生有文行

璣孫秉哲癸未進士

未刊登字慈真木蕭蘇滋熱烈西子舉人閱可讀書不

前卷三集

館

今古林文各著亦

書

執忠同賦賦坐個

圖

不魏靈像黨蘇絲孝慈

自合爾其

江

其法轉字

浙

三十平關

乾雲旋野舉人

工份字率制

嘉興府志卷之十四

知嘉興府事閭陽吳永芳纂修

海鹽縣人物

晉

顧榮字彥先初與二陸入洛稱三俊官廷尉以討葛旗
功封嘉興伯廣陵相陳敏反領眾萬餘榮麾以羽扇
眾潰鄭貴嬪疾元帝廢政榮上疏切諫卒謚元子毗
嗣爵

顧眾交州刺史秘之子以平蘇峻功封鄱陽伯遷尚書

僕射謚靖

干寶字令升其先新蔡人父瑩徙海鹽寶爲著作郎以
平杜炭功賜爵關內侯著晉紀稱良史始著無鬼論
後所殉父婢復生悟幽冥之理撰搜神記劉惔以爲
鬼董狐

何準字幼道廬江灑人穆章后父寓居海鹽屢辟不就
兄充居宰輔權傾一時準遯衡門不與外事追贈晉
興侯子惔以非父志表辭不受

梁

顧協字正禮官散騎常侍清介絕俗謚曰温

到洽字茂沿謝朓以兼資文武稱之任昉善知人嘗指

洽曰此子日下無雙曾侍高祖讌賦詩稱旨入爲吏部累遷中丞

陳

顧越字允南祖道望父仲成世以儒學顯越少孤好學博極羣書補五經博士廢帝嗣立除散騎常侍著有毛詩老子孝經論語義疏

顧野王字希馮祖子喬父烜俱有儒術野王九歲能屬文嘗製日賦領軍朱异見而異之年十二隨父之建安撰建安地記及長遍觀經史嘿識天文地理著龜占候蟲篆筆畫無所不通又善丹青梁宣城王令野

王畫古賢王褒書贊時稱二絕及侯景亂野王歸本
郡募鄉兵援京邑野王體素清羸裁長六尺及仗戈
被甲陳君臣之義順逆之理抗辭作色聞者莫不壯
之後主在東宮掌書記撰玉篇輿地志分野樞要符
瑞圖顧氏譜傳續洞冥記玄象表又有國史紀傳等
書子安饒鴻臚卿

唐

褚無量字弘度精三禮史記之學擢明經累遷學士封
舒國公中宗南郊擬以皇后爲亞獻無量固爭謂禮
無后助祭天之文又病內府書甲乙鼓倒請繕葺以

廣秘集由是四庫完治謚曰文

顧况字逋翁至德中進士遷著作郎坐詩語調謔貶司
戶况兼工小筆求知新亭鹽監或詰之曰余要貌海
中山耳尋解綬去結廬茅山號華陽真逸子非熊盱
眙尉氣啖凌轢爲衆所抑久不第名重天下穆宗勅
賜及第慕父風亦隱茅山

陸元感字達禮父梁學士善班馬學元感得其傳歷黃
州司馬子二南金趙璧南金以匿盧崇道覺坐死趙
璧欲代之因自誣匿崇道請死南金言弟自誣不情
爭之事聞並宥之南金令鄞築堤引湖千頃民爲立

祠

五代

高彥事吳越錢氏征伐有顯功授湖州刺史性淳厚政
尚簡易復領費州刺史子渭徐綰亂彥遣赴敵被害
屠瓌智字寶光從吳越拒黃巢以謀誅董昌積功至越
州都指揮徐綰叛赴援遇害王慟其殉國以衣冠歸
葬澈浦青山贈節度使

宋
朱行先字蘊之猿臂燕頤從吳越征伐累功歷右僕射

郭三益字慎求初爲常熟丞常平使者調蘇湖常秀民

澹青龍江分地程役有功累遷同知樞密

史徽字洵美第進士累遷太常博士時享太廟以宦者
押祭徽建議罷之知青田明敏果斷教民陶瓦覆屋
因免火患建炎初爲司農卿扈駕至平江遇害贈修
撰

沈清臣字正卿爲國子錄勸孝宗力行三年喪爲嘉邸
翊善以直諒稱初從張无垢學後以聖賢自命與其
徒問答語下不契輒使再參著有晦巖集

魯文謐字子順司理高郵疏剔淹獄攝丞幕府撫流民
得所嘗置義庄義塾族孫應龍著有閒窗括異志

常同字子正政和中進士紹興中首論朋黨之禍及呂
頤再相同論其十事罷又論張浚喪師失地尋擢史
館請撫實神哲二史上嘉納秦檜議和同忤意出知
湖州復提舉太平觀同無家寄居天寧僧舍十年自
號虛閒處士卒謚忠毅史稱其才猷可以經邦風節
可以勵世二子祿衿皆典郡有聲孫濬孫舉博學宏
詞爲福州教授

常楙字長孺自號蒲溪漁叟同曾孫淳祐中進士自常
熟尉歷臨安判所至以廉稱鞠范成獄不奉風旨悉
出無辜知廣德軍值水災先發社倉賑饑後請專命

之罪鹽潮害稼捐已帑築成新塘邑人德之出知平
江改浙東安撫使德祐初叅知政事弟棠字召仲隱
居不仕繞庭種竹自號竹窗著渚水志又有弟棐亦
以詩文著

趙孟堅字子固系出安寧郡王寶慶時知嚴州張均平
報父仇坐死孟堅平反之旱饑賑活五萬餘戶遷學
士入元隱居廣陳從弟子昂候之不與見既去爲濯
其坐爲人修雅博識世比之米南宮年九十卒謚文
簡

元

王濟至元初為宣威將軍居澉川時招討王熔決壞永安湖為田湖傷民業多槁濟糾勘還濬為湖澉人德之

明

丁豫字叔寬洪武初應聘入都條對治道稱旨授江西按察使子麟官給事中彈劾不避權要同僚嚴憚之金志剛字大節洪武時為縣三老因公事入都旅見太祖應對敏達授知府

浙

葉春字景暘少時為吏李至剛奇其才薦為郎中歷福建叅政宣德時偕胡槩巡視應天諸郡秉公執法無

所屈撓擢禮部侍郎

常士昌常楸裔孫洪武初以賢良拜雷州守冰蘖自持
有古循吏風

陸定字能舒洪武中以牛諒薦授博士累擢監察御史
上封事六條稱旨旋以疾免官永樂初詔起不赴卒
於家特祠祀之

曹仁字天爵宋太尉勛裔洪武乙丑進士授工部主事
居官清慎數月卽乞休杜門不出自號知止生其四
世孫名鎮通三禮之學隱居鹽之淳風村輯仁遺集
若干卷弘治壬子輸粟五千斛賑饑詔授七品散官

鎮慨然曰吾所以爲此者憫民之疾苦耳豈爲榮身計耶辭不受時稱曹介士爲人整飭雅潔著有家訓

十二則

戈定遠字尙武永樂丙戌入成均拜河南道監察御史彈劾無所避忌擢交趾按察副使時有巨寇董蕃孫聚衆劫掠定遠監守兵擒蕃孫戮之餘悉諭以大義投戈納降者七千餘人旋致仕卒

黃胤宗秦王教授文傑子永樂己丑進士歷官翰林院檢討兩典陝西秋試楊榮誌其墓謂胤宗年十六學爲古文時以起衰自命時越數日成一首見者羣驚

爲怪顧其同僚皆俗吏故卒無有知之者可嘆也爲
博士時亦思自奮於功名之會讀書遇大節偉論輒
自抄寫成帙乃所如不合至老遂自廢獨居官三十
年家無升斗之儲斯則可謂不負所志而無媿乎古
人者也

仲端字惟正永樂辛卯舉人爲隨州知州歲旱貧民苦
饑端移兵餉濟之又逋寇丁朝隆聚衆流劫至是詣
庭待罪調知廣德州擢戶部郎

詹文字好問永樂時入成均爲刑部郎中時有田青崖
者以殺俞一坐死律文疑其獄按之知俞少鬻身于

孫扶則孫以貲自豪欲搆田墓地不可得陰殺俞夜
移其尸置田氏室計挾詐者文得其狀卽釋田坐孫
死律時同官有論主僕宜輕減者文訛曰使田就戮
此命不當償之耶文居官明峻類此

朱侃字志剛永樂中太學生歷官通政使嘗巡撫廣西
兩督漕運具有政績仁宗大漸命迎儲騎行三日夜
至都其勤于王事如此

劉鳳字景儀永樂時人性慷慨有奇略值倭亂官軍調
沈家門海洋防禦多遭風溺鳳建議改爲陸守有九
里三砦之設子泰字世亨景泰辛未進士累官御史

嘗疏劾江淵不法又極論石亨擅權年三十八以勞
卒于官其辭世詩有清白肯爲兒女計疎狂曾爲國
家憂之句人傳誦之

館

倪顒字廷瞻景泰辛未進士歷官懷慶知府歲殫民苦
重賦顒代輸積逋萬餘又建義倉歲積穀于中以備
水旱報最擢副使

鄭延字世昌性孝友博雅善文章人稱東谷先生以選
貢爲廣東提舉清介自矢諸番不敢以方物進陳白
沙贈詩云溪蠻海舶各歸去明月自照芙蓉峰子儒
泰字亨道遵化訓導篤學有孝行著讀史備忘錄行

世

張寧字靖之景泰甲戌進士拜給事中疏勘陳循私子妨賢及闖侍恃寵驕橫中外服其剴切時石亨擅權請乞無厭寧屢請裁止亨深嫉其剛直會有毛憐之變奏請遣使朝鮮朝鮮服其威德謝過入朝人謂寧此行不減重兵十萬云後憲宗踐祚值太后生辰諸大臣行齋醮祈福事寧正言人臣當靖共翊贊不宜崇奉釋老以壞風俗中璫忌其侃直出知汀州尋告歸詔起不赴著芳洲集

常麟成化辛丑進士授兵部郎以禦篩寇功遷河南叅

政值党雄之亂寇勢猖獗麟挺身戡定之累擢福建
方伯時劉瑾索賄不得逮獄幾斃年餘始釋歷官禮
部侍郎

張敏字時勉以鄉貢爲隨州知州新學宮置義塾士子
藉藉稱之報最擢馬湖知府討平鄢藍諸賊有功遷
綿州副使鄢藍餘黨廖陳輩復亂敏入賊營計擒其
魁繫獄內降凡三萬人調山西叅政致仕子淮蔭授
嘉興鎮撫累遷指揮

劉瑋字公奇成化甲辰進士歷官御史督兩淮鹽運兼
治河道值兩浙山東水旱疏請賑以鹽筴餘銀全活

甚衆高郵湖多風濤之險築堤四十里別爲裏湖至
今漕艘賴之擢廣東副使

吳昂字德翼弘治乙丑進士爲宜城令宜俗好惰昂教
民耕織孜孜不倦調新建縣歲饑捐俸煮粥開倉賑
給賴以活者數萬遷福建叅政屢決疑獄如神晉方
伯告歸訂周禮若干卷

錢琦字公良正德戊辰進士盱眙知縣值流寇劉七犯
境琦募士死守民賴以安擢臨江知府時析峽江爲
縣營繕城池圭黍不擾於民民祠祀之有文集十四

卷行世

徐咸字子正正德辛未進士知沔陽州歷襄陽知府沔
故多黍鮮植穀咸教民播種襄有妖民惑衆殲其魁
餘悉解散遷副使告歸著有名臣言行錄諸書

鍾梁字彥材正德甲戌進士授刑部郎諫止南巡廷杖
罷官後詔起歷濟南平陽知府時萊蕪寇反梁以計
悉剿除之擢副使不赴

許相卿正德丁丑進士授給事中世宗時闖人恣橫疏
請繩以重法有中貴羅罪內旨減輕相卿力爭之又
李賢以張欽義子襲錦衣衛相卿劾其貪冒旋引疾
歸子聞造由舉人歷官御史嘗請止礦稅又疏論石

星欺君罔上一時朝士倚重之

錢术字汝冲本姓劉氏嘉靖癸未進士除威縣知縣威
爲劉齊所燼民無居室术捐俸構數百楹俾民居之
又力請於上官蠲各州邑羨并清故時田賦積弊
他邑咸頌其德立祠祀之擢刑部郎

陳言字獻可嘉靖丁酉舉人爲人謹飭舉動必循禮法
學邃于經著有五經疑註并訂定史漢五代史若干
卷行世性孝友事其叔如父撫幼弟以恩私謚文邃
先生

錢芹字懋文嘉靖戊戌進士任永州知府奏捐冗稅萬

餘隆慶初上疏論鹽邑海防事及捕黃魚上貢非便
弟萱字懋孝嘉靖乙未進士授祠部郎論祀典稱旨
出知德慶州民苦征役萱蠲除雜賦又改折運米審
戶籍貧富得均民祠祀之

鄭曉字室甫嘉靖癸未進士授兵部主政以議大禮忤
永嘉廷杖罷官世宗時召補吏部考功郎中值嚴嵩
擅權其子世蕃以治中求爲尙寶司丞曉以非故例
謝嵩怒貶和州判官屢平大寇有功擢鳳陽巡撫遷
刑部尙書論錦衣衛治獄失寔與五城御史受民訟
有違舊制議論侃直嵩深憾之踰年卽報罷穆宗時

追贈太子太保謚端簡著有吾學編古言今言奏議
文集行世子履準蔭授刑部郎

錢薇字懋垣嘉靖壬辰進士授給事中疏論李溫及內
閣費夏剴切無諱尋勅兩廣查餉還論郭翊國恃寵
侵政語及宮僚非人又以星變請斥方士忤旨免官
隆慶時追贈太常寺卿建顯忠祠著有承啟堂集

謝錫教字洪伯萬曆丁酉舉人歷官德州知州歲殫代
民償逋賦數千又顧大年以白蓮倡教聚衆爲亂錫
教悉討平之擢長沙府同知子源濬並有文名

沈奎字文明嘉靖戊戌進士歷官刑部郎中時宗室詔

獄衆論依違奎執大義不屈擢江西副使持論可否
無所與避上官盡忌憚之

徐鷓字鳴川嘉靖丁未進士授肇慶知府時學宮傾圮
鷓發帑新之遷湖南道先是爲水部郎平島寇有功
又劾條鞭法諸省悉遵行之

曹嘉謨字廷述萬曆辛卯舉人授羅山令俗好訟嘉謨
從容語之曰忿可忍網不可觸也人盡感悟越數載
獄無繫囚羅人祠祀之

顧正字尙誠弘治壬戌進士授刑部郎中按問粵西秉
公稱旨擢四川叅議撫定白水之變卒于官

鄭履淳字叔初嘉靖壬戌進士任尙寶司丞時石尙書
在省中以直諫被斥履淳發憤上書論及閹人亂政
廷杖罷官神宗時詔起光祿卿丁母憂疾不勝喪卒
有衡門集

湯彬字子宜嘉靖丙辰進士爲廬江令縣苦重役彬立
計畝僉役之法民稱便累遷河南按察司值荆寇侵
境募士死守民賴以安

馮臯謨字叔初嘉靖庚戌進士歷官廣東叅議時巨寇
張璉侵據饒平西連大埔程鄉諸賊及海寇王伯宣
作亂臯謨以計誘伯宣降協攻大埔程鄉諸賊璉勢

孤就戮擢閩叅政致仕有集十二卷弟嘉謨字猷卿
以選貢任銅仁府幕宣布德威苗民均感其惠擢撫
州知州著銅仁志

胡憲仲字文徵嘉靖庚戌進士任南京刑部郎能釋沉
獄值倭寇南侵憲仲奉檄守太平門防禦有法城賴
以全擢福建叅政

顧霑字少雨嘉靖乙未進士授閩縣令時有闖使暴橫
霑坐之法遷撫州知州撫臣欲築江堤以爲功霑謂
此天險不可以人力爭不聽果敗

劉烱字元白嘉靖庚戌進士歷官撫州守值山寇初退

捐俸以賑瘡痍又築宜黃樂安崇仁三城簡丁壯守禦民賴以安擢方伯致仕撫人思之祠大功祠

錢與映字魯南嘉靖甲子舉人通濂洛之學爲一時名士冠平居不妄著述讀書有所得必期于躬行遠近學者宗之子周以選貢任中書有孝行沉萬曆戊午舉人曾孫焯廬生能文早卒

陳所學字行父嘉靖丙辰進士授給事中條奏部務闕冗並有司賸民十餘事子昌明字季勉以選貢任忻州同知監寧武關值山寇擾亂昌明單車入賊巢諭以大義悉投戈乞降昌明子許廷字靈茂薦授兵部

郎中慷慨有聞于時著有蘇庵集

劉世埏字敬脩萬曆丁丑進士授刑部郎中時以波累繫獄者至數百人世埏悉釋之又著酷吏論爲同曹警弟世教字少彞由舉人爲閩清令決疑獄數十案以署尤溪卒于官

鍾兆斗字秉文萬曆壬辰進士任中書出典黔試稱得人擢給事中有直聲諫止礦稅一疏備言民役之苦剴切無諱

沈孝徵字原萬萬曆戊戌進士歷官汝南副使信陽錄囚多所矜釋殲境內巨盜創長橋跨淮以利光州病

涉者

王家相字維樞萬曆戊戌進士任刑部郎時有闖縛人馬足馳曳至死者力請于上誅之壬子典黔試賞識多寒峻士以勞瘁卒于官

鄭心材字敬中以祖端簡公蔭授應天治中嘗齋餉密雲奇羨一無所取還論劉天緒之獄賴以全者數千人感其德立祠祀之子端胤亦以文行著

顧所有字謙叔隆慶庚午舉人授宜黃令奏捐雜賦又置社倉十三儲穀八千有奇以防水旱祀宜黃名宦吳中偉字生白萬曆戊戌進士歷官光祿寺卿時魏良

卿爲寺丞驕橫不靖偉能以威戢之擢刑部尙書錦
衣衛羅織諸獄悉賴以平又先是爲衡永副使蠲置
九屬學田若干畝都人士至今思慕之子麟趾孝謹
能文章早卒立貞肅公子蕃昌爲嗣孫

俞之泰字坤名萬曆壬子舉人除福寧州守值寇亂後
極意撫綏嘗捐俸賑饑民賴以活又創建養老院以
居民之無依者陞刑部郎中著有海樹堂集

彭宗孟字孟公萬曆辛丑進士爲朝城令有訟鬪毆致
斃者潛察之其人與宦室鬪其兄利弟死挾詐陰擊
致命乃治兄如律旋以治河功擢御史巡視湖廣叅

承天守備內監杜茂縱爪牙盜葬顯陵山麓又疏論
括廢藩產有違祖制時司道郡議加征凡四上章力
爭之旋以乞侍養歸子長宜厚廣期生厚廣以德行
文章著當世不幸被兵卒長宜字德符與期生同舉
鄉榜成崇禎癸未進士授上海知縣釋沉獄數百人
征輸耗羨悉却既而卒于澉川東南士大夫多嘆息
之

彭期生字觀民萬曆丙辰進士歷官南昌知府時撫臣
楊邦憲檄府建魏闡生祠期生抗爭之又豫章樊明
遇諸公被璫坐罪期生發憤凡三上章不報尋丁內

外艱起補濟南知府請罷厲民諸役郡有更生之樂
旋以拂瑯人意謫湖廣照磨辛巳張獻忠陷江西諸
郡御史李邦華薦期生爲湖西僉事單車西行黃穀
爲巾朱絲繩繫劔曰斯二物所以報國而殉身者慷
慨赴道抵吉安擒斬亂兵數千奉詔擢太僕卿仍留
守嶺北時贛州被圍期生登章貢臺坐臥矢石間凡
六月守將通欵外兵夜登遂潰滇越兵招之出走曰
此吾死所將安往死卽死耳母爲他人辱徐起以繩
自繫不死遂拔劔自刎旣而降將行城上識其尸排
墻覆之臺焚俱燼故吏杜鳳發瘞視之惟心不毀殮

以石函後曾堯景攜之來鹽人謂期生忠義所感云
朱學忠字葵愚萬曆辛卯舉人授耒陽令縣故好惰學
忠課以耕織孜孜不倦遷絳州知州執法不阿強藩
屢以計中之不顧報最擢刑部郎子適成英敏善文
章推重邑中

徐從治字肩虞萬曆丁未進士授桐城知縣築堤以禦
水患鉏強扶弱民盡悅服累遷兗東副使巨寇徐鴻
儒聚黨剽掠從治監平東部下兵奪擊破之調山東
兵備道時遼兵已陷登州巡撫孫元化被執從治監
軍救登比至萊諸軍敗績叛兵曳柴蒙質而攻城城

崩一角從治植柵補垣募士死守相持二百餘日遼人殫于攻謾書求撫督師劉宇烈次軍平度州屢檄救援不進從治走間道力爭曰賊借撫緩兵援兵裹足臣寧死爲厲鬼以殺賊也遼人計不行圍益急從治巡城中竟以飛礮陷顛死朝論憫之卹贈兵部尙書賜祭葬立祠蔭子同貞爲錦衣衛百戶同貞通史學累官僉書同知祀鄉賢

吳麟瑞字思王萬曆己未進士授常州府推官疏剔白糧織造諸弊以甦民困累遷九江叅政值寇亂之後極意撫綏擢方伯作瞽論萬言極陳時政害民阻於

有司不得達告歸後詔起偏沅巡撫時三楚已陷麟
瑞破家募海上勇士千餘人促裝就道比至沅兵已
并即撫矣遂回籍聞弟麟徵殉難慟哭成疾卒幼弟
麟武字六駕以貢士授饒州通判後棄官歸隱有集

一卷

吳麟徵字聖生天啟壬戌進士歷官給事中引太祖制
請收中貴權又奏罷厰員以拂璫人意告歸懷宗時
復起都給事中力救熊開元劉宗周姜埰諸公寃獄
幼周延儒黨比誤國又屢奏徙寧遠鎮兵以禦闖賊
久不報比下賊已薄都城矣未幾城陷麟徵取酒與

故人祝淵共飲因題絕筆曰祖宗二百七十年宗社
一旦失之雖上有龍亢之悔下有魚爛之殃身居諫
垣無所匡救殮用青衫單衾布席足矣棺宜早歸恐
繫先人之望茫茫泉路炯炯寸心瞑予目者又不在
此也遂死議卹死事贈兵部侍郎謚忠節 國朝錄
明死節諸臣賜謚貞肅

吳北輿貞肅公長子重然諾好獎士類卓然以豪傑自
命不幸早卒弟蕃昌爲尙書中偉承祧孫痛貞肅公
殉難顏所居曰祗欠甲申間行淮上迎喪至家遂棄
諸生杜門不出嘗師事山陰劉宗周作日月歲三儀

以自範爲闡職三儀以範其家遭母喪哀毀成疾卒
有詩一卷

賀萬祚字孝延萬曆庚戌進士督學山東屏絕請托覬
遺人不敢干以私調嶺北道時巨寇胡扶記亂盡圍
兩江州縣祚疾馳上官以方畧捕扶記就戮招降莫
敬龍等所部千人置之內地時江西流寇方肆焚劫
圍安定祚至相視羊角石背諸營堡賊聞有備引去
祚生平未嘗言兵所至輒以兵顯旋以病乞歸卒於
舟次不得究所設施云

朱泰禎字道子萬曆丙辰進士授龍巖知縣縣遭水患

禎發官粟賑之擢御史巡按雲南時黔寇劫掠滇中
泰禎自成都發蜀中兵剿滅之比至雲南水西川東
烏撒三大寇合數十萬犯霑益守兵僅六千泰禎以
方略捕賊黨帥就戮擒獲數千人水藺烏三大寇復
犯炎方泰禎樹柵爲城設伏待之賊殊死鬪諸軍驅
象陣橫擊賊大奔擒竜戈資俘斬之築四石城于炎
方曰懷德畏威招攜懷遠樹京觀立銘紀功焉黔國
公啟元雄蹇不馴泰禎鎮以寧靜滇黔得安丁父憂
歸起補京畿道御史改南兵部主事以勞致疾卒于

官

許士奇字雅正萬曆丁未進士爲黃州推官鋤强暴釋
沉獄政聲籍籍累遷成都知府值奢崇明亂後人煙
絕少士奇勞徠安集之生聚如故擢川南副使時蘭
酋合諸巨寇焚劫黔中制府檄士奇搗蘭援黔士奇
監將吏練士秣馬築城興屯守禦備至蘭酋合水西
據險轟古箐中陡峻不可攻士奇構離其黨與遂破
巢殄滅之陞楚臬擢布政司

劉泓字長源萬曆庚戌進士歷官武選郎中能清軍政
歷淮徐兵備道時李復陽等擁衆侵掠豐沛間泓躬
擐甲胄擒其魁就戮餘悉解散又疏免逋賦及柳草

耗費民咸便之有文集若干卷

胡震亨字孝轅天啟丁卯舉人任合肥知縣理冤獄減
耗羨具有寔政吏治之餘尤留心韜鈴嘗與劉綎論
兵老將心折尋以病乞歸崇禎時寇擾中原侍郎朱
大典薦震亨知兵略詔起定州知州州當師行孔道
民貧恒苦供億震亨撫緝有方圭黍不擾于民民得
休息以守城功擢兵部郎乞歸校訂毛氏汲古閣藏
書并唐音統籤海鹽圖經行世

沈胤芳字隆生崇禎丁丑進士歷任淮海副使值鳳陽
亂後捐俸以撫瘡痍又發官帑掩淮泗間白骨無算

內擢簡漕儲道所歷諸省咸歛約廉靖不擾于民先是兌漕旗丁多驕悍不戢盾芳言於漕撫檄斬其尤者數人嗣是少斂民感頌之

曹履泰字方城天啟乙丑進士除同安縣令縣多獠獞時出剽掠殺人履泰至訓練鄉勇朝夕衛禦盜遂相戒勿犯時督撫受鄭芝龍降部卒橫行海上履泰悉以重法繩之與芝龍同降者李魁奇挾鍾斌叛去履泰陰攜其黨不數日魁奇就擒斌投水溺死嗣是邊海晏然報最擢給事中屢請選將練兵勿倚芝龍爲長城又糾吏部李希揆躡等典銓中璫深忌嫉之遂

罷官後郝彪佳諸公交薦不赴子元方崇禎癸未進士爲常熟縣令隱淳村著有淳村集

方戡之字耆定以世官陞南京大教場坐營都司大閱營兵挾餉離伍歷階上戡之按劔叱之兵遽巡退密告司馬捕斬亂首擢劉河遊擊金山叅將修金山衛學濬河士民咸利之轉臨沅副總兵安奢二賊梗滇黔戡之自廣林烏蠻灘越棧度崑崙關自交趾界達臨安扼守楊林水藺烏宐大至進屯馬龍州掘塹設伏對山多張旂幟以疑之賊閉壘不出戡之合副將袁善兵驅象馬直衝之賊大潰斬首四千級捷聞加

職一級陞漳泉副總兵策普名聲必反瀕行告之黔
國及撫院既至漳將舟師逐鍾斌合鄭芝龍烏尾船
圍之斌窮蹇衣銀甲腰纏四元寶沉海死舟積金銀
七艙戡之禁官兵無登秋毫無所取捷聞論功普名
聲賄構飛語中之落職歸名聲反黔國上其書稱先
見雲撫錢士晉議起之以討名聲以老病辭壽八十
五卒

馬孟驊工筆札騎射以世官歷陞鎮浙總兵時海寇劉
香流突浙閩三省會勦驊督兵出海劉香敗死於閩
其父鳳以餘衆詣浙降鎮浙六載海氛寂然

彭宗周襲海寧衛指揮掌衛印管屯田事免扣軍修城
銀以屯糧餘耗充之歷陞北洋遊擊海寇震服

曹憲來字茹真原名仲麟由選貢除肇慶府通判清理
廠稅督造戰艦以才能著三署邑篆均賦役却羨耗
咸有惠及于民又條陳救荒策大要以卹郵丁開米
禁除濫耗設義倉爲務按臣上其議下諸郡縣悉遵
與行之以丁父憂歸遂不復出初憲來父鴻臚公與陳
詹事同學詹事以女妻憲來憲來子四人悵惘恂恪
盡從陳姓云

徐一源字宙孟由選貢爲歸德經歷清潔自矢上官多

忌憚之以拒寇功遷通判崇禎十三年寇犯歸德時
官軍他徙一源躬被甲胄單騎力抗斬首數百人柰
救援不至城破被執不屈自刎死祀歸德名宦

吳文憲字萬爲由選貢授衡州通判值礦賊嘯亂文憲
以單車解之又監守兵滅桂陽大盜萬餘告歸論救
荒築塘諸策悉有裨益著師陶閣集一卷

湯雲章邑諸生少以節義自期議論慷慨不屑苟同于
俗晚居郡城殉難死子芬字芳侯崇禎癸未進士爲
山陽縣令執法不阿一時豪右屏迹改授督餉推官
遇兵見害其子千里奔閩負骸歸葬

國朝

彭孫適字駿孫順治己亥進士戊午擢博學宏詞第一
由編修歷簡少宰內閣學士生平以文章上結主知
分校鄉會試者二充纂脩總裁者三屢邀異數室無
一金之儲比致仕歸門戶寥寂直不異窶人寒士云
著有松桂堂集

吳謙牧字衷仲前中丞麟瑞次子髫齡以五經補學官
弟子隨棄去邃于性理之學著五子折衷及困勉齋
集學者爭傳誦之遭母喪哀毀如禮比葬嘔血數升
卒人稱死孝云

錢何青原名汝霖號芸祀安貧樂道不求聞于時隱居
半邏村躬行孝弟以率門弟子四方學者雲集時號
商隱先生有校訂性理諸書及文集行世

查培繼字王望順治壬辰進士除東莞縣知縣有政聲
累遷江西副使三署臬篆折獄惟以理解不妄鞭朴
先是居諫垣疏減南折浙東民至今猶感頌之

彭孫貽字羿仁前太僕期生子少有至性太僕殉難章
江孫貽身冒鋒刃走淮上以求遺骸旣而萬安曾堯
景携骨來鹽人謂太僕忠義所感亦孫貽仁孝所致
云孫貽爲人廉謹中前壬午鄉薦後棄去不仕事毋

夫人無間言私謚孝介先生著述甚富有心者多珍藏之

陳之問字令升幼穎達自百家子史以至方言術數靡不究覽稍長悉棄去潛心濂洛關閩之學於六經性理能抉摘其微義嘗兀坐一室手自批註皇極經世諸篇每至夜深不倦爲人醇雅不與人較是非獨論學則毅然不苟時語人曰儒林道學宋史判爲二途以孔孟之家法裁之亦曰學而已矣故儒者不必標道學之名顧道學正儒林之實聞者奉爲篤論黃太冲爲作傳云常從學於蕺山漳海兩先生顧未嘗講

學與人言者不出詩書然而知學者莫如先生又云
先生之力學寒士中所未見傳中極其推許諸子自
司寇宗伯以下及諸孫科第仕宦最盛生平焚券賑
饑諸義舉不可勝數黃傳俱不之及曰恐先生之力
學爲富貴所掩也有經疑若干卷文集若干卷行世
吳夔字汝典前孳廉晉晝子幼孤力學弱冠蔚然爲儒
宗會其叔早卒撫諸從弟恩禮備至生平淡泊自甘
不妄仕進顧士無賢不肖盡欽服之著有采山詩集
張惟赤字螺浮順治乙未進士累官給事中數上章奏
悉中時務以掌工科卒于官子皓字皜亭由舉人歷

官主政已卯分校武闈所得多干城之選

朱亮采字杓雯順治丁酉舉人爲慈谿教諭新學舍端
士習聲譽藉甚擢岳陽縣令罷故時夫役驛傳諸弊
又創義塾置學田以惠諸生之困乏者士民均沾其
惠伐石紀之

鄭宣字巨展康熙甲辰進士殿試二甲第一改授內閣
中書乙卯分校北闈得名士九人出爲淮安同知惜
公帑軫勞役政績茂著總河疏請大用之未果卒著
有滄江集

錢瑞徵字鶴菴康熙癸卯舉人授三衢教授持行嚴謹

訓士必以禮法尤勤講課所拔名士俱先後成進士
子綸光字廉江性落拓能詩家貧脩脯以奉其親人
無間言

吳甫及字維申康熙丁未進士歷官農部郎清操自勵
不攜家累尤好剔故弊同僚咸忌憚之自奉布衣蔬
食卒之日幾無以爲殮著有青山艸堂集

俞雲來字漢乘康熙庚戌進士授安仁知縣從親王督
師江上招降朱天錫等數千人又全活廣建諸郡飢
民甚衆調補湖口縣縣鄰于苗雲來撫以恩信民盡
帖服報最擢五城兵馬司正指揮

曹燕懷字二社康熙庚戌進士授內閣中書分校北闈
甄拔多知名之士爲人剛健論事不肯少屈以此人
忌嫉之竟不盡所長卒

錢之燾字幼日弟紹隆字仲扶康熙癸丑科同榜進士
之燾博雅善詩古文辭與彭少宰齊名未及授官卒
紹隆爲四川富順縣令時蜀中初定一以寬仁撫綏
之窮黎頓有起色行取補給事中
張行健字天行以縣椽爲江南大洪司巡檢甲寅饒寇
犯境死守被執勸之降行健仰天自誓毒罵不肯少
屈賊怒砍其臂行健罵益甚置之土坑中以刃中其

腹行健猶作大聲曰吾死猶將爲厲鬼滅汝也賊殺之事聞卹贈金山衛經歷給誥勅特祠祀之

沈光珏康熙壬子舉人少負異質有得于性命之學于

四書大易及正蒙諸書多所纂述爲人嚴厲不苟訾

笑先達多慕效之子李楷庚辰進士由庶吉士出爲

饒州知府

俞兆曾字大文康熙乙丑進士授元城縣令興教化勤

撫綏癸酉爲順天同考官得姜宸英趙徵介諸人俱

以文學德政著名于時元城當孔道凡往來供億與

官馬芻牧諸費不擾于民去官時黎庶攀號畱之

徐士鷺字雖飛康熙己丑進士授庶吉士學問淹博同僚咸倚爲重未及大用卒論者惜之

顧鳴陽字岐雖康熙辛未進士授山陽縣令縣號煩劇鳴陽惟以樸誠處之人服其廉靖故時有夫役驛傳及芻牧官馬諸弊鳴陽一切裁之山陽人至今思慕之

沈德涓字二含以明經爲開化訓導值兵燹後人盡棄學德涓竭力振興之一時文風甲于三衢又捐俸鼎新學宮纂輯聖門表誌諸書無忝厥職

海學宮崇道聖門先哲精書

尤學藝既成也悉與之一切館

於盛昌宇二合以開發流用書

文

又感於有溫前漢書圖

即則卦以對精衷之人

應與則宇如錫氣烈卒未

於氣尚為重未必大風卒命香帶文

翁士驚宇繼深寒烈与丘哉士與魚青士學國欲樹同

館

書

圖

江

浙

山景

印育夫

今線

供億

孝義

漢

施延字君子沛國人移居海鹽通經學家貧任作養母

順帝時徵拜太尉

書

晉

李祥隆安中從內史袁山松築壘滬瀆禦孫恩山松遇

害祥突白刃收袁尸歸葬時人義之名其所居里曰

教義里

浙

梁

陸黯海鹽民侯景之亂黯舉義眾襲宋子仙破吳郡殺

嘉興府志 卷之四
三
偽守蘇單于推陸襄行郡事復偕陸緝戴文舉襄兄
子映公帥眾拒子仙力戰吳淞江上雖不支敗績時
人多歎慕之

宋

郭知運字次張刻志問學舉進士甲科時相強欲婚之
不就仕至荆門守有文集

元

劉儼字敬先博學善詩文娶瞽婦終身相敬如賓門人
蕭孚貧卻贄且周之友友人沈德常死鬻產葬之今
祀鄉賢有文集行世

陸壽一宋外樞密副使旋吉八世孫明經學著孝經傳
二卷隱居梅花莊方道獻薦官之不就從祖居仁卒
鬻產以紀其喪年九十餘卒私謚貞毅先生江陰孫
作誌其墓

鄭元璠元琰兄弟並以學行知兵顯名方國珍張士誠
往來海中爲寇二人率兵禦之鹽城賴以全

過宗一字貫之少失父事母盡孝母卒六年不克葬苦
麻涕泣如故時有白燕巢其室及葬不復至

沈壽康一名嗣昌字原懋少通經學居父母喪盡禮臺
省薦官之不就人呼其里曰孝隱村

俞福一至正時爲綠谿書院山長事母盡孝子柱通經學明初向瑤薦脩禮書歷聘不赴趙俶銘其墓

賀傑元末爲嘉興萬戶值革命解所佩金牌投幽蘭井中遁居當湖終焉

陳寶生字彥廉至正時人工詩尤善書畫少有至性以父溺海死終身不至海上與王子久交最善子久時造其室偕之觀濤將至東城忽涕泣不與俱子久哀之爲之動容歸而著讐海賦以紀其事

明

沈珍字瑤穀洪武初以布衣赴闕上興利除害十事除

散官不就子昊字孟暉有孝行宣德初析當湖鎮爲
邑昊偕陸珪昆季共創大成殿今二姓子孫科第不
絕云

陸宗秀字坦菴陸正曾孫永樂初徵召不仕歲饑傾粟
麥二千九百石賑濟詔旌其門曰尙義子珪字廷玉
嘗代輸一邑之賦景泰時連年饑疫珪與弟璫瑜瑾
各散給穀麥凡萬餘斛勅授迪功郎
潘允濟洪武五年上疏闕下極論海溢淪田請築海塘
如議至今邑無漂沒之患

崔永字彥齡七歲喪父母他適會後夫坐事攜戍海南

嘉興府志 卷之四 三
永慟哭走京師哀請于朝乞釋其母歸比歸至江右
舟溺永入水負母母得生永竟感寒疾死

胡寬字景灝弟宏字景容少失父兄弟友愛甚篤事孀
母敬養不衰按臣疏其母節上聞並旌其孝

陸鮮字一拙十二齡補邑諸生好脩俠行倭寇犯鹽時
傾家召集鄉勇數千朝夕防禦衆籍以安又郡中屢
經水患鮮捨地爲義塚殮瘞浮屍數百郡守梁材高
其義勒石紀之

夏瑞三歲喪父事母孝嘗割股以療母疾邑令旌之
陳源字本深性孝友父產悉讓昆弟歲稔煮粥濟衆邑

人賴之

陸平世陸祥洪熙正統間歲殪先後各捐粟五千八百斛並授散官詔旌其門曰義門

莫藏字用行海鹽諸生工詩文著有佩觿稿五音辨訛諸書父患疽刲股投劑療之人稱其孝

王紀字宗憲由歲貢任徐州吏目嘗奏捐州之冗稅又請罷海鹽民兵鹽人德之祀鄉賢

童輝字景文以選貢爲鎮江府幕母蚤世事父能以色養年七十餘猶戀戀如嬰兒

王儀字汝儀自稱古鐵生善詩畫少有至性母歿廬墓

嘉興府志 卷之四
三
側晚年作君子小人圖并題以自警

仇武昂必顯必達必侃兄弟四人交相友愛里人匾其
堂曰和樂正統間官軍禦倭沈家門山覆溺爲出粟
募漁筏救之得生者七十二人

王輔字時佐海鹽人少從父戍廣寧中山東鄉試歷官
刑部郎中居嫡母喪盡禮臨終語其子曰我死必返
葬於鹽無忘首丘也子獲復歸於鹽獲孫家棟萬曆

丙辰進士

顧昂字文顒成化時爲新泰典史數上疏請鎮城事朝
議躋之訖如所請

顧薇性至孝父母歿刻像事之出入必以告又奉繼母如其母始失愛卒感動焉

胡彭述字信甫邑諸生弱齡喪父事母甘旨不失又敬養其從兄數十年人亟稱之有好古堂集

葉春華少爲衛卒操作以奉其母邑令旌之

孫浩正德時爲蒲城丞倡脩義塾其裔肯堂以選貢爲翻陽訓導捐俸以惠諸生纂修邑乘祀鄉賢

陸良毋病不起刲股救之撫愛季弟甚篤按臣旌之

朱文才激人慷慨好爲義舉所建六里壩文星臺至今

尙存

嘉興府志 卷之四 三
葉芳荃字友輿勾塍里人割股以療母疾時人呼葉孝

子

許聞至字長聖少博洽著大易微言尤有至性居父喪
哀毀骨立爲其弟償逋賦至破家不靳卒祀鄉賢

劉祖錫字子福父世坊早卒祖錫廬墓如禮由選貢爲
江右府判甫數月乞侍養歸棲依丙舍以孺慕終其
身

徐藻字子潔邑諸生痛父罹倭毒具奏召集鄉兵滅賊
以雪父冤名忠孝軍乍浦沈莊之戰並有功焉

夏正字時寅性孝友親歿廬墓三載事其兄盡敬鄉里

陸達陸定子永樂時薦授博士性孝友兄弟同居數十年未嘗析箸庭有紫荆一本數幹時人呼其所居里曰祥里

吳芸字時美好爲俠士行子霽善承父志人稱其孝

沈孟賢永樂時太學生築海塘二十餘丈有詔勅旌其門孫衡字平甫中成化庚戌進士歷官刑部郎中平反大獄甚多衡子奎以神童見召

仇俊卿字舜徵家貧好讀書年餘九十猶不釋卷由舉人任惠安令終國子監助教嘉靖時倭寇南侵作備倭數策陳之浙撫時人義之

嘉興府志 卷之四
陸宗仁字元善壽一曾孫由舉人爲太平判歲饑賑活
二千餘戶告歸建祠于梅花山庄祀其先樞密諸公
置義田若干畝族人之困乏者悉賴之

王大猷字伯甫嘉靖丁未進士歷官滇粵僉事廉介自
持不苟取予家居修脯自給縣令魏公憐其貧遺之
金固辭不受

劉世坊字敬止性慷慨嘗置田三百畝以饒戚族之無
依者

吳晉晝字接侯弱齡舉于鄉工詩文兼善書畫事親純
孝病劇不廢定省年二十七卒時論惜之

稱之

鄭忠材字孝標刑部履準子讀書有過人行弟恕材出後子叔仍以父產均之敦睦恤貧嘖嘖人口

祖武功字孔昭邑諸生有孝行弟歿撫遺孤成立時人義之

徐廷泰字宙知髫齡失恃事後母孝謹父病晝夜泣禱于廟有道人持方至投之卽愈道人竟不知所往人謂孝感云

鍾曉邑諸生家貧事孀母盡孝母歿病噎以死

周至德字岸登邑諸生性行醇慤士林多推服之嘗拾

遺金於道埃其人至歸之人盡稱其廉介

聞華卿痛父早歿偕其弟構廬墓側奉母以終其身

彭紹賢字孔嘉以世職歷叅將晉階昭毅性孝友祖業
悉讓從父子宗礪以母產亡值生辰必素服流涕又
讓世爵于弟卒謚貞懿先生

顧冀字子期嘉靖舉人父嘗患瞽日侍左右不離母歿
至終喪猶涕泣如故祀鄉賢

朱璫字朝華嘉靖時歲貢置朱氏祭田若干畝歲稔傾
粟以賑宗族鄉黨嘖嘖稱其慷慨

王衷字本誠持已嚴毅張方洲與之交壽以金不受傭

書積數百金悉捐之建順寧橋

陸源初家貧好行其德外孫王文祿作古民傳誌其遺事

曹禎好義俠時嘉靖間倭寇掠大康橋禎與弟袂召集鄉兵擊之倭悉引去事載靖海紀畧

張亨家半路亭嘉靖間官兵與倭戰孟家堰死者數千人亨悉殮瘞之又收甲仗數百餘上之官中憲劉公旌之

沈藻字元明嘉靖丙辰進士歷官泰州守告歸家徒四壁教授生徒以奉養其親有薄產悉讓昆季子弘達

嘉興府志 卷之四
貢士弘遇邳州守俱有孝行

賀南儒嘉靖己未進士爲閩縣令以勤勞致疾卒子萬春走數千里迎其喪歸萬曆時爲鴻臚丞數月卽以侍養告歸母有瞽疾萬春妻趙日以舌舐之復明

鍾祖保字念之弟祖述字君明俱諸生號能文章祖保尤有俠行嘗條陳大造積弊鹽人德之

陳梁原名昌應字夢張與魏大中交最善大中被逮賊無所出梁捐數千金代輸之大中子學伊死哭之哀甚同里陸廷揚爲次其軼事作高士傳

徐應奎字星魯父病隆冬思食瓜泣禱于天瓜纍纍垂

藁葉下食之病愈人呼其里曰孝瓜村

朱正學字中庸兩中副舉不仕母歿父凡三娶後妻正學咸盡禮事之悉得其歡仲子豫順明濂洛之學不幸早卒

吳之英字千朋以舉人爲蕭縣令歲殪煮粥濟人又設藥局以療病者人頌其德祀鄉賢

蔡惟祺七歲喪母哀痛倍成人事後母曲謹學使者旌之

周紹宗字岐陽本姓馬氏幼失恃爲其姑母後事慈母敬養備至其本生之後母患瞽亦迎養盡禮人稱孝

子

李淑字仲素居鄉謙謹不與人較是非葬戚黨之貧者十餘匱又迎養其族之鰥寡數人人稱其好義云

鍾鴻穎字海槎天啟舉人爲上海縣令有平寇功卒于官從弟顥字盥若童時跪吮父疽以孝聞

陸廷揚字西來平湖人天啟時爲中書避亂移居半邏村其姑母早嫠而貧迎養之至終身友人沈位中卒撫其遺孤迄成立

張煥字垂章幼有至性七齡父病目刲股以療邑令旌之

張調元字六息天啟舉人名節白持不事干謁少失怙
恃事後母純孝承歡終始不媿孝廉

顧文輝字射墟崇禎舉人鄉民有負官租者將鬻其妻
輝爲乞貸代償之使完聚云

張源思字睿衷崇禎庚辰進士少孤力學事母盡孝嘗
伏闕陳情詔旌其母初爲高要知縣行取給事中晚
年遯跡著書有文集

許令瑜字鍾叔崇禎癸未進士爲仙遊知縣棄官歸隱
足不至城市子齋讀書有志節著有鐵函子集行世
沈誼徵字天谷崇禎時中順天副榜歷官鳳陽通判禦

寇保民有循良譽以勞瘁卒于官先是鹽有倭患誼
徵選丁壯數百人竭力防禦衆賴以安祀鄉賢

朱廷章字如日鄉賢朱茂明子好讀書時以節義自期
工詩文悲憤成疾卒

查大焜字伯符孝廉查志洽孫少時慕季心劇孟爲人
喜周人之急時以豪俠自命戚故窮而無告賴以舉
火者甚夥

趙科字南泉崇禎壬午大禔捐粟煮賑邑令旌之

徐昌治字覲周崇禎舉人授通判後隱不仕壬申弟從
治殉難昌治匹馬走間道抗言劉宇烈撓法貽誤封

疆宇烈被逮時人咸服其忠義著有綱鑑燦行世

陳悃字不困崇禎時選貢少嗣于伯慈母早婺而貧悃携其本生貲奉之甘旨必備旣而殉難卒

朱學章字穉韜崇禎間上萬言書極論時政得失晚棄諸生杜門不出私謚節隱先生

馮吉詹道張卿皆彭太僕期生義僕太僕殉難章江三人俱不屈自刎又楊大器曾堯景俱萬安人借故吏杜鳳殮太僕遺骸歲辛卯堯景走兵火中負骨歸鹽聞者咸爲感嘆

沈鸞訓導沈肯堂僕嘉靖癸丑倭掠西郊將刃肯堂鸞

以身蔽之泣請代死倭爲所感舍去

國朝

徐乾貞字御六廩貢生以孝友著邑中其弟蒙貞早卒羣推乾貞子承祧先是蒙貞有妾生子育于外人鮮知者乾貞詢得之嘆曰吾弟自有子吾固不忍利弟所有也隨招之歸見者咸爲感泣比之許武薛苞云徐豫貞字德宣別號滄浮天性孝友家門雍睦晚年肆力於詩文公卿咸折節與之友著有滄浮子詩集逃莽稿諸書

楊斌字乘六海寧人僑居海鹽少孤事母能以色養乙

昔西大兵至海寧城母老病不能行兵至將刃之斌以頭觸地號泣請代死大兵爲之動容并其母舍之

徐儲元字翰飛順治辛卯拔貢廷試授通判讀書樂道
王以孝友律身著有詩集子始亨字東崖以選貢爲遂
安訓導課士有法遇貧生尤能竭力周之遷縉雲教
諭

徐炳雲字三孺由舉人爲武義教諭代諸生償逋賦數
百有貧不能舉火者周之至傾囊弗靳武義士大夫
肖像祠之

鄭旦復字昭侯康熙丙午舉人少孤奉侍其叔如父懷

嘉興府志 卷之四
三
慨好施時爲貧交倚賴初上公車聞叔訃音至哀毀
成疾卒于中道

鄭應生字時可少有大志讀書動以古人自期遭父母
喪哀痛踰禮路人咸爲感泣伯兄貧而早世奉養其
婆嫂數十年無間其友人卒代償積逋累數百金無
怨容衆論歸之祀鄉賢

王之曾字懷曾世居沈蕩讀書以明倫爲重性慷慨能
施濟于人庚辰春公舉鄉飲大賓郡守額以丘壑夔
龍甚洽鄉評

許全泰原名翰字周翰弱冠爲諸生隨棄去隱居村落

好行慷慨無倦色又善事其後母私謚和惠先生

崔玉潔字在郊孝子崔彥齡裔幼失怙事母孝既而兄弟卽世恩撫諸孤成立創宗祀置祭田春秋備禮子梅邑諸生孝友兼至王尙書揆題贈

張源長字德孺少孤事母孝處兄弟間終身友愛無間有姊氏早寡迎養數十年敬禮不衰

張龍楨字默菴邑諸生性孝友有弟早歿撫其遺孤家貧典貸賑饑范鯤銘其墓

顧惟贊號質文州同知少英敏喜讀書敦倫睦族里黨稱之

朱本徽字效文紫陽夫子裔也幼英異通經史名著郡
中克紹家聲生平重義慎交孝親敦本凡族黨貧者
婚喪皆其身任子璠珍璋俱有文行

俞嗣榮字位思邑庠生壯年喪耦不娶置義田以贍族
著自鏡錄

陳堯勳字怡生倜儻有大節好施與敦族誼以醇謹稱
於鄉

李商玉澉浦人痛父母俱死於兵布疏終身精星學授
徒所入竭力營父母窀穸外盡出所蓄千金斃治墩
鎮街衢由郭達郊靡不修舉里人名之曰報恩街

文苑

梁

戚袞字公文武帝時策問周禮禮記袞敷對無遺宋懷
芳號儒宗秘藏儀禮記疏將亡謂家人曰吾死必付
戚生後與徐摛質難諸儒攝氣袞領答如流撰禮記
義四十卷

齊

顧歡字景怡六歲時父使驅雀田中作黃雀賦家貧不
能從師聽鄰人讀書悉記不遺遭母喪水漿不入口
者七日太祖時召見有麈尾素琴之賜著文義三十

卷

宋

魯訔字季欽與兄詹弟訥子可封可簡族子文謚文博
諸孫璠珏开鐸皆舉進士以文學世家訔尤有名曾
註杜詩及冷齋集行世杜詩之有編年自言始也

陸峻乾道中進士累官至尚書峻守衡楊萬里以書屬
其孫為名流倚重如此

李正民字方叔揚州人仕至待制提舉洞霄宮紹興中
倚居海鹽善屬文邑中碑記多出其手

陸啟禎象山先生裔宋末為巡司構室天柱山聚徒講

學卒謚貞恪

陸能仁宋咸淳進士時伯顏兵亂隱居靈溪世稱高士

元

屠曾字體乾受書于吳草廬澄至治癸亥中浙榜第一

有虞庭慶雲賦

姚桐壽字樂年博學多識元季攜其子來鹽就婚沈氏

遂家焉著有樂郊私語

陸正字行正通律呂象數之學歷聘不起隱居教授其學以慎獨存心爲要著正學編樂律考七經補註行

世私謚靖獻先生

許棐號梅屋隱居秦溪室中懸白香山蘇子瞻二象事
之間人有奇編輒借抄錄以故環室皆書著有獻醜
集

常詵孫字宜卿累辟不就門人稱雪溪先生著有雪溪
稿天閑雜錄櫟齋筆記

董鎮深于經術有用世之志值元亂隱居泉山

陸德方字顯叔至正時爲般陽路學正避亂掛冠歸傭
書於沈氏沈知其賢以女妻之明初以逋臣薦不赴
孫固字以貞雅致恬淡署華亭學諭與楊維禎陶南村
倡和成帙自題其齋曰聽雪胡儼有聽雪齋記

明

董澐字復宗與沈周孫一元交最善家徒四壁日放浪山水間年七十執經陽明先生門下其友人咻之不聽曰吾自從吾所好耳遂自號從吾道人

李孟璿與弟仲璣季衡並以經術著聞孟璿爲汝寧訓導著聖門誌季衡著西溪集其裔孫多聞人稱世家許珣字士章正統丁卯舉人博綜載籍執經者滿戶張寧劉泰鄭延諸公皆其及門高第初爲安溪教授典應天鄉試乞歸河南陝西江西復三聘爲考官所至

稱得士

唐貞字士幹爲東莞丞時從楊鐵崖講學激人韓履祥
詩有宦遊踰嶺海聲價動京華之句

陸德裕字孟含宣德丙午舉人通周禮以經學教授弟
子著有禮翼四卷

姚士粦字叔祥少有異質好讀人間未見書與馮祭酒
夢禎同校宋史又偕沈士龍諸公定十六國春秋南
唐書及諸秘籍邑令樊維城纂修志乘士粦考核居
多

朱朴字元素少好詩垂老吟咏不輟時偕諸同志劇飲
酒酣興發卽舉筆大書同社鍾彥村徐子正諸公咸

異其才心折之中憲徐白泉先生聞其名遣幣招之不報有詩集二卷

陳鑑字用明少好俠忽而謝世事閉門讀書一時名士羣推爲社長有勾溪集二卷弟金爲博野令亦工近體有擬試帖一卷

胡顏字希仁好吟咏委棄世故時有超世絕俗之概同時能詩者如朱西村王犢舟輩皆有倡和今失不傳其得附見於陳勾溪陳墨山集中者僅二十首

錢籥字懋明邑諸生嘗鄙俗學之陋日取小學置案頭顏曰砭盲詩文博雅磊落金華吳孺子吳下王伯稠

同邑姚士彝輩咸心折之子應曾應晉應旨並以文學著

朱祚字天錫平生慕司馬公爲人時書無事不可對人言之句以自警爲尤溪令卒於官著有拙齋雲谷集
陸鯤字斯溟邑諸生家貧好構異書聚徒講學入其室
繞榻皆書人稱敏齋先生

劉演字文敷成化甲辰進士爲刑部郎中值闖瑾亂政拂衣南還時與林下諸公迭相倡和擢四川叅議不赴有文集

陳善字敬佐性穎悟爲詩古文詞不屬草藁願求之者

非其人雖重幣不作初爲崇陽訓導年餘卽高臥不出孫詢工詩畫聞于時

王洪字宗範爲陽明先生入室弟子陽明子正億執經于洪

陸贄字順德宣德時倡明正學私謚貞一先生其同遊楊復生張綱皆能詩文復生字繼先尚胥里人

徐晟字公允博涉書史嘗與大叅王公論漢雋數事時稱徐漢書所著有左氏摘事燕石存稿

湯紹祖字公孟善爲駢麗之文嘗訂定續文選三十二卷著有清遠堂集

嘉興府志 卷之四
朱洪字文濟博學能詩爲鄉里所重子棊楷俱諸生工
文辭尤善繪事同邑鄭端簡錢太常諸公嘖嘖稱之
彭暉字日華嘉靖初爲河南學諭家貧力學工詩古文
辭弟暄以明經教授邑中遊其門者盡良士云

采九德字常吉由選貢爲教授嘉靖倭變時著東寇紀
略二卷子士英字茂含讀書有志節著海寧衛乘十

卷

徐泰字子元髫齡舉于鄉好讀書手不釋卷初爲光澤
縣令未幾告歸林居四十年日偕同志諸人飲酒賦
詩有淵明太白遺風所著玉池稿談屑諸書約十餘

種

董毅字碩甫由舉人爲漢陽縣令告歸四壁蕭然惟攜書自怡當晝炊烟未舉猶散步澗墅吟咏自若其豪曠多類此後遊陽明先生門著性論一篇

賀簡字朝重苦志篤學能默誦五經由舉人爲恩平令卒于官

王鰲來字巨元少穎敏善古文辭著有唐宋文刪二十卷初由舉人任思恩同知擢僉事告歸生計屢空絕無幾微見於顏面

呂元美弟元善少有聯璧之譽元美由廩貢生任省幕

元善爲山東理問撰東省通志又著聖門一志及諸
儒宗系若干卷

王文祿字世廉少以文章節義自命居身廉峻不屑苟
同於人弱冠叨鄉薦年八十猶走長安就試卒不第
士類惜之著有文獻志諸書行世弟文禎善詩畫日
遊齊魯間晚年爲衡府記室

祖晟字廷昭少耽吟咏得句每爲時人所稱由歲貢授
宿州訓導告歸二十載嘯歌不輟有詩集孫重葉官
行人

曹名卿字肖泉八歲能詩前輩有神童之目弱齡食鱸

於庠陳詹事見其文嘆曰神施鬼設間見層出不謂
孟郊而後有斯異才顧數試不售旋膺貢爲鴻臚寺
丞著有蟬餘集

楊春芳字子含邃于經學善屬文由舉人授巴東縣令
有廉聲時進士子講論詩文竟日不倦巴東人號爲
儒吏

錢端暉字弢父精于三禮之學舉動必由之嘗就鄉試
發策非所問題詩省舍拂袖徑出有詩集若干卷姚
士舜叙并撰儒隱先生傳

朱載黃字穀修清脩力學與物無競晚棄諸生村居不

出

劉傑字季俊通律呂書數少學禮於許伯全受尚書於許宏譽德器淳雅鄉黨推爲儀矩

陸廷鴻字羽儀博聞多識著聲郡邑間晚棄諸生日偕李天植彭孫貽諸公遯蹟著書終焉

吳麟振字達生九歲能爲古文尤工書法自言學書當以羲繇爲繩準若流而蘇米則跛偃欹斜甚矣爲人恬靜雅飭私謚文隱先生

國朝

錢潤徵字侗菴十齡爲學官弟子前崇禎時舉于鄉性

落拓布衣蔬食晏如也與修熹宗寔錄辛酉歲稜上
救荒六議全活無算著有大政廣攷咏紅集弋獲鈔
胡季瀛字子輔少通達於書無所不窺中順治戊子副
榜歷官潯陽知府所至廉靖能以所學化人後歸里
日與彭孫貽何園客輩唱酬吟咏足不入城府士論
高之

朱景肅字子子弱齡補弟子員以選貢任常山學博未
幾歸里日攜琴書自娛既老猶勤著作無虛日有詩
文集

童申祉字百旂博綜典故士林推爲雅望詩文數千言

嘉興府志 卷之十四
立就時人方之司馬子長以明經授臨安教諭所著
百一編凡二百餘卷

鄭亮字雪堂康熙丙辰進士善詩文時人奉爲典型曾
受趙萊陽聘較藝閩中一時風氣賴以大振著有文
集祀鄉賢

顧弘字葯菴爲人整飭不苟訾笑由歲貢授太平教諭
能以嚴毅化諸弟子累遷崖州知州

朱正標字介子邑諸生性誠樸言動必準乎禮家無擔
石廉介自持以終其身子勸亦孝謹能文章膺貢未

幾卒

楊鼎字鼎臣弱齡補弟子員聲譽鵠起遊其門者多掇
高第而鼎竟垂老不遇誦讀自若無幾微怨尤色著
有詩文諸集

錢采字介亭康熙壬子副榜晚年偕從兄汝霖究心理
學講求經義著有聖廟從祀考性理纂諸書行世

浙江圖書館



浙江圖書館

浙江圖書館
總館設於杭州
分館設於各縣
民國二十一年
十一月一日
成立



浙江圖書館



浙江圖書館



浙江圖書館



浙江圖書館



浙江圖書館



浙江圖書館


Blue Cyan Green Yellow Red Magenta White 3/Color Black

TIFFEN Color Control Patches

© The Tiffen Company, 2007

Centimetres

1 2 3 4 5 6 7 8 9 10 11 12 13 14 15 16 17 18 19
1 2 3 4 5 6 7 8



浙江圖書館



915-1242
0027



浙江圖書館



Inches 1 2 3 4 5 6 7 8

Centimetres 1 2 3 4 5 6 7 8 9 10 11 12 13 14 15 16 17 18 19

TIFFEN Color Control Patches © The Tiffen Company, 2007

Blue Cyan Green Yellow Red Magenta White 3/Color Black